


PC 3398 A7 1907 UNIV. OF TOPONTO LIBRARY











ARMANA 9548

# PROUVENÇAU

PÈR LOU BÈL AN DE DIÉU

1907

#### ADOUBA E PUBLICA DE LA MAN DI FELIBRE

Porto joio, soulas e passo-tèms en tout lou pople déu Miejour

AN CINQUANTO-TRESEN DÓU FELIBRIGE



86649

**AVIGNOUN** 

ENCÒ DE J ROUMANILLE, LIBRAIRE-EDITOUR 19, CARRIERO DE SANT-AGRICÒ, 19

#### ESCLUSSI

l'aura en 1907 dous esclussi de souleu e dous esclussi de luno.

Esclussi de souleu :

Lou 3 de janvié, esclùssi toutau, invesible en Avignoun. Lou 10 de juliet, esclùssi annulàri, invesible en Avignoun.

Esclüssi de luno:

Lou 28 e 29 de janvié, esclussi parciau, invesible en Avignoun. Lou 24 de juliet, esclussi parciau, en partido vesible en Avignoun.

#### FESTO CHANJADISSO

Cèndre. 13 de Febrié. Pasco, 31 de Mars Rouguesoun, 6, 7 e 8 de Mai. Ascensioun, 9 de Mai. Pandecousto, 19 de Mai Ternita, 26 de Mai. Fèsto-de-Diéu, 31 de Mai. Avènt, 1 de Desèmbre.

PC 3397 LUNO MECROUSO

La luno d'abriéu, que fai lou 12 d'abriéu.

A7 1907

Luno mecrouso, Femo renouso, E auro que sort de la bruno, Dins cènt an n'i'aurié trop d'uno.

#### TEMPOURO

Febrié	20,	22 e 23	Setèmbre	18,	20	0	21
Mai	22,	24 e 25	Desèmbre	18,	20	e	21

Lou printèms coumenço lou 21 de Mars; L'estiéu coumenço lou 22 de Jun; L'autouno coumenço lou 23 de Setèmbre; L'ivèr coumenço lou 22 de Desèmbre.

> Trento jour an Setèmbre, Abriéu, Jun e Nouvèmbre, De vint-e-vue n' a qu'un. Lis autre n'an tre to-un.

Vin de Sautèu

#### **JANVIÉ**



D. Q. lou 7, à 2 o. 57 m. N. L. lou 13, à 18 o, 6 m. P. Q. lou 20, à 20 o. 51 m. P. L. lou 29, à 1 o. 54 m.

Li jour crèisson de 1 o. 4 m.

#### FEBRIÉ



D. Q. lou 5, à 43 o. 1 m. N. L. lou 22, à 5 o. 52 m. P. Q. lou 19, à 16 o. 44 m. P. L. lou 26, à 18 o. 32 m.

Li jour crèisson de 1 o 31 m Li jour crèisson de 1 o. 48 m

#### MARS



D. Q. lon 6 à 20 c. 51 m. N. L. lon 13, à 18 c. 14 m. P Q lou 21, à 13 o. 1 · m. P. L. lou 29, à 7 o. 53 m.

-		
1	dim.	Jour de l'An.
2	dim.	S. Clar.
3	dij.	Sto Genevivo
4	div.	S. Ferriòu.
5	diss.	S Simeoun de la coul.
6	DIM.	Li Rei.
3 4 5 6 7 8 9	dil.	S Lucian.
8	dim.	S. Severin.
9	dim.	S. Julian.
10	dij.	S. Pau l'ermito
11	div.	S. Teodòsi.
11	diss.	S. Gaspard.
13	Dim.	Sto Verounico
14	dil.	S. Alàri
15	dim.	S. Bounet
16 17	dim.	S. Ounourat
17	dij.	S. Antoni.
18	div.	Sto Flourido.
19	diss.	S. Canut.
20	DIM.	S Sebastian.
19 20 21 22	dil.	Sto Agnès.
22	dım.	S. Vincèn.
23	dim.	S. Ramoun.
24	dij.	S. Bausèli.
25	div.	Counv. de S. Pau
26	diss.	S Ansile.
27	DIM.	S Màri.
28	dil.	Sto Cesario.
29		S Coustant.
30	dim.	Sto Martino.
26 27 28 29 30 31	dij.	Sto Marcello.
		1

1 2 3 4 5 6 7 8 9 0 11 12 11 3 14 15 6 17 8 19 21 22 23 4 25 26 27 28	div. diss DIM. dil. dim. dij div. diss DIM dil. dim dij. div. diss DIM dil. dim. dij. div. diss DIM dil. dim. dij. div. diss DIM dim. dij. div.	S. Ignàci, ev. LA CANDELOUSO. S. Blàsi Sto Jano Sto Agueto Sto Doro. S. Richard. S. Ginous S. Jan de Mato. Sto E-coulastico. S. Adòufe. Sto Làli. CENDRE. S. Valentin. S. Quenin. S. Armentàri. Sto Mariano. S. Flavian. S. Valié. TEMPOURO. S German, Sto Isabello. S. Meraut. S. M tias. S. Aleissandre. S. Nestour. S. Ounourino. S. Cassian.
28	dij.	S. Gessian.

	1	div	Sto Antounino.
.		diss	S. Simplice.
- 1	2 3 4 5 6 7	DIM.	Sto Cunegoundo
-	4	dil.	S. Casimer.
-	5	dim.	S Ambrosi.
ı	6	dim.	Sto Couleto.
	7	dij.	Sto Perrètio.
	8	div.	S Jan-de-Diéu.
-	9	diss.	Sto Franceso.
١.	10	Dim.	Li 40 Martir.
	11	dil.	S Gregòri
	11	dim.	S. Meissemin.
ı	13	dim.	Sto Eufrasio
-	14	dij.	Sto Matiéndo
	14 15	div.	S. Cesar de Bus.
	16	diee	S. Abram.
	17	diss Dim.	PASSIOUN.
	18	dil.	S. renle.
	19	dim	S. Jóuse.
	190	dim	S. Jouse. S. Jouaquin. S. Benedit.
	21	dii.	S Benedit.
	99	div	S. Ben-vengu.
	23	dij. div diss.	S. Vitourin.
	24	DIM.	RAMPAU.
	25	DIM.	ANOUNCIACIOUN.
	26	dim	S. Massimilian.
	27	dim.	Sto Natalio.
	28	dii.	S. Ilarioun.
	29	dij div.	DIVENDRE-SANT
	30	diss.	S. Amadiéu.
	31	DIM.	PASCO.
		1	1

# Vin de Sautèu

AU VIÈI RATAFIA DE MAZAN

DEMANDA PERTOUT FAU

#### ABRIÉU



D. Q. lou 5, à 3 o. 29 m. N. L. lou 12, a 7 o. 15 m. P. Q. lou 20, à 8 o. 47 m. P. L. lou 27, à 18 o. 14 m.

#### MAI



D. Q. lou 4. à 10 o. 2 m. N. L. lou 12, à 7 o. 15 m. P. Q. lou 20, à 1 o. 37 m. P. L. lou 27, à 2 o. 27 m.

#### JUN



D Q. lou 2, à 17 o. 29 m. N. L. lou 10, à 11 o. 59 m. P Q. lou 18, à 15 o. 4 m. P. L. lou 25, à 9 o. 46 m.

Li jour crèisson de 1 o. 40 m. Li jour crèisson de 1 o. 18 m. Li jour crèisson de 17 minuto.

1 2 3 4 5 6 7	dim.	S. Agne. S. Gautié
3	3.5	D. Cautio
4	dim.	S. Richard.
	dij.	S. Isidor.
5	div.	S. Vincens-Ferrié
6	diss.	S. Prudènci.
7	DIM.	QUASIMODO.
8	dil	S. Aubert
9	dim.	Sto Soufio.
10	dim.	S. Leoun,
11	dij.	S. Macari.
12	div.	8. Benjamin.
13	diss.	Sto Ido.
14	Dim.	S. Benezet.
15	dil.	S. Frutuous.
16	dim.	S. Lambert.
17	dim.	S. Anicet.
18	dij.	S. Apoulòni.
19	div.	S. Oufege
20	diss.	S Ansèume.
21	DIM.	S. Ouspice.
22	dil.	Sto Leounido.
23	dim.	S. Jòrgi.
24	dim.	Sto Vitori.
25	dij.	S. Marc.
26	div.	S. Clet
27	diss.	Sto Zeto.
	Dim.	S Vidau.
29	dil.	Sto Catarino de S.
30	dim.	S. Estròpi.

1 2 3 4 5 6 7 8 9 10 11 12 13 14 15 16 17 18 19 20 21	Dim. dil. dim.	S Brancaci. Sto Glicèro. S. Bounifàci. S. Pons. S Gènt. S Pascau. S. Fèlis. PANDECOUSTO. S. Bernardin. Sto Estello.	1 2 3 4 5 6 7 8 9 10 11 12 13 14 15 16 17 18 19 20 21	dil. dim. dim. dij. div.	Sto Lauro. S. Marcelin. Sto Cloutiéudo. S. Quentin. S. Bounifàci. S. Glaude. S. Nourbert. Sto Pelagio. S. Medard. Sto Felicita. S. Barnabéu. Sto Oulimpo. S. Antòni de Pado S. Basile. Sto Moudèsto. S. Cèri. S. Ouzias. S. Verume. S. Gervàsi. Sto Flourènço. S. Léufré.
12	Dim		12		Sto Oulimpo.
	dil.			dij.	S. Antòni de Pado
	dim.				
22		TEMPOURO.	22	diss.	S. Estròpi.
23	dij.	S. Deidié	23	DIM	Sto Agrevo.
24		S. Dounacioun.	24	dil.	S. JAN-BATISTO.
25	diss.			dim.	Tresl. de S. Aloi.
26	DIM	TERNITA.	26	dim	S. Dàvi.
27	dil.		27	dij.	S. Adelin.
28				div.	8 Irenèu.
29			29	diss.	S. Pèire e S. Pau.
30	dij.	S. Felis.	30	DIM.	S. Lucide.
31	div.	Festo-de-Diéu.			

# de Sautèu

AU VIÈI RATAFIA DE MAZAN

FAU DEMANDA PERTOUT

#### JULIET



D. Q. lou 2, à 2 o. 43 m. N. L. lou 10, à 3 o 26 m. P. O. lou 18, à 1 o. 21 m. P. L. lou 24, à 16 o. 38 m. D. Q. lou 31, à 14 o. 35 m.

Li jour demenis, de 51 m.

#### AVOUST



N. L. lou 8. à 13 o. 46 m. P. Q. lou 16, à 9 o. 15 m. P. L. lou 23, à 0 o. 24 m. D. Q. lou 30, à 5 o. 37 m.

#### SETEMBRE



N. L. lon 7. à 9 o. 13 m. P Q. lou 14, à 15 o. 49 m. P. L. lou 21, à 9 o. 43 m. D. Q. lou 28, à 23 o. 46 m.

1 Drm. S. Baudèli.

Li jour demenis. de 1 o. 34 m. Li jour demenis. de 1 o. 42 m.

1	dil. dim. dim. dij. div. diss. Dim.	S. Marciau.
2	dim.	LA VESITACIOUN.
3	dim.	S. Anatòli
4	dij.	S. Fourtunat.
5	div.	S. Pau de Liss.
6	diss.	Sto Angèlo.
7	DIM.	Sto Aubiergo.
	dil.	Sto Isabèu.
9	dim.	S. Bres.
10	dim.	ND. de SANTA
11	dij.	S. Pio.
12	div	S. Ounèste.
13		S. Anaclet.
14		S. Bonaventuro.
15	dil.	S. Enri.
	dim.	ND. DOU M. C.
17	dim.∙	S. Alèssi.
18	dij.	S. Toumas d'Aq.
19		S. Toumas d'Aq. S. Vincèns de P.
20	diss.	Sto Margarido.
21	DIM.	S Vitour.
22	dil.	STO MADALENO.
23	dim.	S. Cassian.
	dim.	Sto Crestino.
25		S. Jaume.
26	div.	Sto Ano.
27	diss.	S. Pantàli.
28	DIM.	S. Sanàri
29		Sto Marto.
30	dim.	S Loup.
0.4		

- 1	1	1		
	1 2 3 4 5 6 7 8	dij. div.	S. Pèire encadena S. Estève.	
	3	diss.	Sto Lidio.	
١	4	DIM	S. Doumergue.	
1	5	dil.	S. Ion.	i
-	6	dim.	S. Sauvaire	
	7	dim	S. Gaietan.	
	8	dij.	S. Justin.	
	9	div.	S. Rouman.	
-	10	diss.	S. Laurèns.	1
	11	Dim	Sto Rusticio.	1
	12	dil	Sto Claro.	1
	13	dim.	S. Pourcàri.	
		dim.	S. Chapòli.	
	15	dii.	ND. D'AVOUST.	
	16	div.	S. Ro.	ŀ
	17	div.	S. Jacinte.	١
	18	DIM.	Sto Eleno.	ı
	19	dil.	S. Geniés.	ı
	20	dim.	S. Bernat.	ľ
	21	dim.	S. Privat.	l
	22	dij.	S. Safourian.	l
	23	div.	S. Sidoni.	ľ
	24	diss.	S. Bourtoumiéu.	l
	25	DIM.	S. Bourtoumiéu. S. Louis.	ı
	26	dil.	S. Zefirin.	ı
	27	dim.	S. Cesàri.	ı
	28	dim.	S. Julian.	ŀ
	29	dij.	S. Jan degoulàssi	ı
	30	div.	Sto Roso.	ı
	31	diss.	S. Lazàri.	ı
		1		l
	4 6	-	FAU	_
1	te	u	FAU	

	Din.	D. Daudon.
2	dil.	S. Agricò.
3	dim.	S. Aidu.
4	dim.	Sto Rousalio.
5	dij.	S. Lóugié.
6	div.	S. Amable.
7	dias.	S. Autau.
4 5 6 7 8 9	DIM.	N -D. de SETEMB.
9	dil.	S. Veran.
10	dim.	S. Pouquerié.
11	dim.	S. Pacient.
12	dij.	Sto Bono.
13	div.	S. Antounin
14	diss.	Eisaussamen de la Crous.
15	Dim.	S. Anfos.
10	dil.	S. Cournéli.
17	dim.	
14	dim.	S. Lambert.
18	dim.	TEMPOURO.
19	dij.	S. Genouvié.
20	div.	S. Estàqui
21		S. Matiéu.
22		S. Maurise.
23		Sto Tèclo.
24	dim.	Sto Salabergo.
25		S Fermin.
26	dij.	S. Auzias
27	div	S Cosme e Damian
28	diss	S. Ceran.
29	DIM.	S. MIQUÈU.
30	dil.	S. Jirome.
	1	

### Vin de Sau

dim. S. German.

AU VIÈI RATAFIA DE MAZAN

DEMANDA PERTOUT

#### OUTOBRE



N. L. Jon 6, à 22 o. 30 m. P. Q. lou 13. à 2? o. 11 m. P. L. lon 20, à 21 o. 23 m. D. Q. lou 28, a 20 o. 1 m.

Lijour demenis, de 1 o. 45 m. Lijour demenis, de 1 o. 20 m.

#### NOUVEMBRE



N. L. lou 5, a 10 o. 48 m. P. Q. lon 12, à 5 o. 23 m. P. L. lou 19, à 12 o. 13 m. D. Q lon 27, à 16 o. 30 m.

#### DESEMBRE



N. L. lou 4, à 22 o. 31 m. P. Q. lon 11, à 14 o. 25 m. P. L. lou 19, à 6 o. 4 m. D. Q. lou 27, à 11 o. 20 m.

Li jour demenisson de 20 m.

I							
1 2 3 4 4 5 6 6 7 8 9 10 11 12 13 14 15 16 17 18 19 20 22 23 24 25 26 27 28 8 30 31	diss. Sto Tùli. Dim S Evòsi dil. S Baque dim Sto Repe dim. S. Danis dij. S. Vergé div. S Castor diss S. Verau dil. S. Gerau dil. S. Calist dim. Sto Terè dim. Sto Rous dij. S. Flour div S. Lu diss. S Gerar Dim. S. Crapà dil. Sto Urst	ge gard. 2 1an. 3 3 3 56s d As 4 5 6 6 6 7 arado. 3 11 11 11 11 11 11 11 11 11 11 11 11 11	div. diss. Dim. dil. dim. dij. div. diss. Dim. dil. dim. dij. div. diss. Dim. dil. dim. dim. dij. div. diss. Dim. dil. dim. dij. div. diss. Dim. dil. dim. dim. dij. div. diss. Dim. dil. dim. dij. div. diss.	Toussant. Li Mort. S. Marcèu. S. Chamas. S. Zacarié. S. Estève (d'Ate). S. Eroèsti S. Goufrèdi. S. Maturin. S. Just S. Martin. S. Mitre. S. Ru, ev d'Av S. Eugèni. S. Euquèri. S. Agnan. Sio Audo Sto Isabèu. S. Eimound Present. de ND. Sto Cecilo. S. Clemènt Sto Floro. Sto Catarino Sto Dóufino S. Sifrèn. S. Soustène. S. Savournin S. Anarièu.	1 2 3 4 5 6 6 7 8 9 10 11 12 13 14 15 16 17 18 19 20 21 22 33 24 4 25 5 26 27 28 30 31	Dim. dil. dim dim dij. diw. diss. Dim. dim. dij. diw. diss. Dim. dim. dij. diw. diss. Dim. dil. dim. dij. diw. diss. Dim. dij. diw. dij. dim. dij. diw. dij. diw. dij. dim.	S. Timou'eoun. S. Filougoun. S. Toumas I. m S. Ounourat. Sto Vitòri. S. Ive. CALÈNDO. S. Estève. S. Jan, evang. Li S. Innoucènt. S. Trefume. Sto Couloumbo

## Vin de Sautèu

AU VIÈI RATAFIA DE MAZAN

DEMANDA FAU

# CROUNICO FELIBRENCO

E Diéu çai-sié! bràvi coulègo, meinagié de la bono, pelot atravali, ràfi voulountous, gardian de Camargo e pastre de Crau, bouscatié dóu Ventour e castagnaire di Ceveno, bon pople miejournau que parles la lengo de ta terro e te chales à legi l'Armana; e vàutri, peréu, sounjo-fèsto plen d'amenanço, cansounejaire risoulet, pescoluno incoumparable, trevaire d'ideau e destouscaire de Cabro-d'Or; e vàutri, sabentas d'Alemagno, d'Americo, de Suedo e d'en-pertout que mandas sus li papafard prouvençau li rai requist de vòsti majestous bericle; o, en tóuti vautre que chuchas em'afecioun lou moust di tino leialo ounte s'amaduron à la fes li blóundi clareto d'Eirago e lis esperanço pouëtico dóu Felibrige, en tóuti vautre emai is autre, l'Armana Prouvençau un cop de mai fai si salut.

Lou mounde, boutas, es un bèu sa de gàrri de-longo en bourroulamen; e sèmblo pas verai que se posque pas, à la fin pièi, vèire lusi lou jour ounte cadun se tendra bèn siau dins sa bastido, à la sousto de la triho peiralo, bevènt « lou bon soulèu que reviscoulo » e cantant li cansoun di felibre... Durbès li journau; ié vesès que malamagno e treboulino: guerro d'eici, guerro d'eila, revoulucioun d'avau, anarchìo d'amount, e zóu toujour! de cop de coutèu, de cop de pistoulet, de mouié que s'ensauvon, de marit que fan tampino, d'enfant que patisson, basto! sèmblo que nosto pauro terro devèngue mai-que-mai un inmènse Mount-de-Vergue ounte se jogo à quau mai reno, à quau mai sacrejo, à quau mai se despoutènto...

E fau pas crèire, bràvi masié que m'agachas de-galis en richou-

nejant, fau pas crèire que, soulet, agon d'aquéu mau li gènt de vilo: Vautre, tambèn, descouneissent la pas armouniouso de vòsti gara libre e sanitous, vous plagnès trop souvent de graisso, e sias jamai countent de rèn: se plou de-trop, tout sara nega, se jalo pas proun, la recordo vendra marrido, se lou vin aboundo, se vendra pas, se fauto, es uno pieta... Aqueste an falié vous ausi quila sus la secaresso!... Ah! bèu bon Diéu, quete sequige! de tout coustat li lengo presumisson: acò vai adurre la famino, vai carreja li malandro, vai faire mouri lou bestiau!... Eh! bòni gènt, tenès-vous dounc en repaus, fisas-vous à la sagesso di rèire e fasès voste gramaci, bèn countent de ié vèire clar souto la capo dóu soulèu, en vous rapelant que:

Eissuchino marco pas famino. Jamai secaresso aduguè carestié. Quau semeno en póussiero fai forto la garbiero.

Voulès que vous lou digue? Touti aquéli renarié, subitamen despareiran de dessus terro quand tout lou mounde sara Felibre... Avès pas besoun de teni vòsti mino em'un èr de dous èr, voulènt dire que parle pèr escàfi. Sabe ço que dise, e, ço que dise es la verita. La que dins lou Felibrige que se rene jamai, que se cante de-longo, que l'on s'escoutelle pas, que li mouié fugon senado e li marit galoi, que l'on prengue emé soulas lou tèms coume vèn e que l'on begue emé coungoust, en pensant i bons àvi que li plantèron, lou vin requist de nòsti vigno... Acò 's talamen verai, que li gènt reboussié, li marrit caratère, li faus e li double, li bico-frejo e li tiro-l'aufo, se, pèr rescontre, se foro-vion dins li vergié felibren, podon pas se i'endeveni, e renon de-longo contro lou Felibrige amistadous, lou Felibrige franc e leiau, lou Felibrige enfin, sènso mai, que davalè de Font-Segugno coume la lèi de Mouïse davalè dóu Sinaï.

Aqueste an, coume lis autre, li fèsto felibrenco fuguèron l'enauramen dou soulas, dou gentun, de la gau e de la pouësio. La Santo Estello fuguè celebrado à Ceto lou dimenche de Pandecousto, 3 de jun 1906, à l'aflat de la Felibrenca de Sent-Cla. La vèio, un Grand Béure acampavo li proumié felibre arriba en ciéuta cetòri. L'endeman se tenguè dins la matinado la proumiero sesiho dóu Counseu Generau dou Felibrige, coumpausa di majourau e di president dis Assouciacioun afihado au Felibrige. Se ié decide que l'assemblado sant-estelenco se fara l'an que vèn en Peirigord. l'aguè pièi reünioun counsistourialo ounte fuguèron reçaupu bon noumbre de sòci estrangié. Après uno poulido sesiho de la Soucieta 'litéràri de Ceto, presidado per Mistral, li Felibre s'entauleron à la visto espetaclouso de nosto mar « Sarnèio » de-longo bluio em' esbléugissènto. Festin esquist avien adouba li Cetòri. La felibrejado fuguè meravihouso de gaieta e de freiresso e se dèu gramacia tout particulieramen lis ourganisaire Soulet, Therond e Galibert.

Au Champagno, après lou discours dou Capoulié que legirés plus liuen e lou cant de la Coupo que larguè magnificamen lou Mèstre, lou 1<sup>6</sup> conse de Ceto, Molle, se revelè mèstre ouratour. Barrios aduguè lou salut di Catalan. Se debano forço brinde e discours, pièi l'on s'embarco pèr lou Briso-Lamo ounte se dèu teni la Court d'amour. Favourisado pèr un tèms de la benedicioun, aquelo passejado em'aquelo sesiho literàri fuguèron un chale pèr tóuti, e gènto D¹o de Baroncelli, aclamado Rèino di Jo Flourau, segnourejè sus un pople vertadieramen estrambourda. Lou vèspre, felibrejado de tout caire e cantoun. L'endeman, felibrejado encaro à la baraqueto dou majourau Therond. Se pòu dire veramen que li Cetòri an prouva l'afecioun la mai escleirado e la mai leialo freiresso en tóuti li Felibre.

De touto part, aqueste an, li Felibre an felibreja; rapelaren soulamen eici quàuquis-uno de si felibrejado.

Lou 22 d'outobre, à-z-Ais, acamp de Felibre de Prouvènço. Chabrand ié representé lou *Flourege prouvençau* e parlè en ome de cor em'en bon patrioto.

Li Toulousan de Toulouso, dounavon sa fêsto à Toulouso, lou 16 de desèmbre.

Lou Flourege que se reünis tóuti li dimenche, douné mai que d'uno fèsto, entre autro aquéli dou 4 de febrié, dou 11 de febrié (à Maiano, pèr Santo Agueto), dou 18 de mars, dou 7 d'abriéu, e enfin acampado generalo tengudo en Bartalasso lou 30 de setèmbre que fuguè favourisado pèr la presènci de F. Mistral e lou sourrire di dono e de la naturo.

L'Escolo Mistralenco s'acampè souvent, en particulié li 24 e 25 de mars, per la representacion de Charloun e Charloto, de J. Sorbier, emai lou 10 de jun.

Lou Bournat de Peirigord tengué soun acamp annau à Bergeira lou 1<sup>t</sup> de juliet.

Lou meme jour, s'acampavo à Ceto la Felibrenca de Sent Cla.

L'*Escolo Gaston-Fèbus* chausiguè Mount-de-Marsan pèr ié douna li 28 e 29 d'avoust de fèsto magnifico.

L'Escolo di Pirenèu s'acampè à Luchoun lou 5 de setèmbre.

Prouvênço? de Marsiho douné soun grand festenau au castéu dis Eigalado lou 24 de jun.

L'Escolo de la Crau s'acampè lou 8 de juliet.

Enfin, signalaren encaro la Fèsto vierginenco di Sànti Mario que, beilejado pèr En Folcò de Baroncelli e J. Grand, president de la Nacioun Gardiano, fugue fort bello.

Se li Felibre « fan la fèsto » tambén travaion, e, aqueste an, li

counferènci soun estado mai-que-mai noumbrouso. Citaren en particulié aquéli d'En Pau Chassary, sus Calendau, à Béziés, lou 13 de janvié, de P. Devoluy sus lou Felibrige en At, lou 6 de mars, e sus la Doutrino felibrenco au Flourege, en Avignoun, lou 18 de mars, de Bacquié-Fonade à Toulouso, i Toulousan de Toulouso, etc.

Mai li Felibre fan pas que parla, escrivon, acò se saup, e se falié noumbra tout ço que pareigu $\hat{e}$  en lengo nostro despi $\hat{e}$ i douge mes, sarié pas proun de tout noste Armana.

Avèn la chabènço de saluda en proumié li *Memòri de Mistral*, que, pareigu d'abord dins uno revisto de Paris en sa traducioun franceso, vènon de nous arriba dins la plenour magnifico dóu tèste prouvençau. *Li Discours e Dicho de F. Mistral*, ounte soun recampa li leiçoun majouro de la dóutrino felibrenco, s'ameriton uno mencioun especialo. Publica pèr lou *Flourege prouvençau* aquéu voulume de proupagando es indispensable en tóuti aquéli que s'entrason de la Reneissènco Miejournalo.

Signalaren peréu lis àutri publicacioun o broucaduro que nous soun pervengudo :

- Contes Lengadoucians, de Gustave Thérond, emai prefàci de A. Chassary.
- Annuàri di Jo Flourau Renan (Coulougno).
- La Terras de llengua Catalana, de J. Delpont (Perpignan).
- Viveto, de Chabrand (foro librarié).
- Rèsto dins toun vilage, de Chabrand.
- Li Cant de l'Araire e lis Eiguierenco, de E. Lebre.
- L'Oulo d'Arpian, de Chabrand.
- Li Nouvè de Peirol e di Rèire, publica per lou proumié cop emé lis er nouta, per lis abat Gonnet e Chouvet.
  - Lou Rousàri d'amour, de J. Monné.
  - Li Sànti Mario de Prouvênço, peço courounado, per Ant. Berthier.
  - Prèp del Clouquié, de A. Benazet.
  - Li Piéu-Piéu, 27 cansoun de A. Jouveau.
  - Pou Biladye, de Lacoarret.
  - De nostra Terra, de En Joan Badóa (Barcilouno).

- Rialles, de En Joan de la Sanya.
- Flors d'Occitania, d'En P. Estiéu
- Lo Gèni Catala, de J. Falp y Plana (Barcilouno).

Etc., etc.

Sens coumta la longo tiero di publicacioun perioudico: Armana, revisto e publicacioun o journau que creisson toujour.

Devèn apoundre tambèn que lou Counsistòri felibren s'es acampa à Nimes lou 8 d'abriéu, e, qu'entre àutri causo, a nouma tres nouveu majourau, R. Fournier, de Beziés, Bounet l'einat, d'Avignoun, e de Villeneuve-Esclapon, de Paris.

E, aro, vesès proun, bon Prouvençau de la costo pleno, que li Felibre soun pas de fulobro e que l'oubrage ié fai pas pòu. E coume voudrias pas que fuguèsson tóuti atravali sus soun pres-fa patriau quand lou Grand de Maiano, sèmpre que mai jouine e sàvi, i'alargo sènso lassige, e tant aboundous, e tant fegound, l'eisèmple de soun obro d'engèni, quand de tout païs mounto un cantico à l'amiracioun, de Mirèio, de Calendau, dóu Rose, dóu Museon Arlaten... E quand lis editour dóu Mounde entié se disputon aquéli Memòri delicious que soun belèu la mesoulo la mai entimo e sabourouso de la Dóutrino Mistralenco.

JAN MALAN.

Jan l'Amelo labouravo sa vigno.

- Eh! bên, acò se fai bèn ? ié diguère en passant.
- Demandas-lou à la miolo, me respoundeguè Jan l'Amelo.

Se marida lou divêndre, coula bugado, cura li fedo, leva li cèndre o chanja si lançõu, tant vau la cordo au côu.

Lou dimenche te pausaras, Mai li jour oubrant trimaras.

### LA CANSOUN DIS AVI



REFRIN

An viscu,
An tengu
Nosto lengo vivo;
An viscu
An tengu
Tant coume an pouscu!

Soungen qu'avans-courrèire, Li rèire, li rèire, Soungen qu'avans-courrèire Pèr nautre an courregu.

An viscu, etc.

Soungen qu'an fa mirando E grando, e grando, Soungen qu'an fa mirando Sus lou Rose fourcu.

An viscu, etc.

S'avèn aquest terraire, O fraire, o fraire, S'avèn aquest terraire, Es qu'éli l'an agu.

An viscu, etc.

S'avèn lou vin de souco En bouco, en bouco, S'avèn lou vin de souco, Es lou vin qu'an begu.

An viscu, etc.

E manjan la seisseto, Rousseto, rousseto, E manjan la seisseto Di terro qu'an mougu.

An viscu, etc.

E pèr desfaire l'òli Tant jòli, tant jòli, E pèr desfaire l'òli, Soun gàubi a faugu.

An viscu, etc.

Tout ço qu'avèn de voio Revoio, revoio, Tout ço qu'avèn de voio D'éli nous es vengu.

An viscu, etc.

Au tron de Diéu ferouge E rouge, e rouge, Au tron de Diéu ferouge Toustèms an cresegu.

An viscu, etc.

Tout ço que nous rènd libre, Felibre, Felibre, Tout ço que nous rènd libre, Lis àvi l'an vougu.

An viscu, etc.

De joio e d'agradanço I danso, i danso, De joio e d'agradanço N'avien mai que d'escut.

An viscu, etc.

La Gràci, fiho gaio, Cascaio, cascaio, La Gràci, fiho gaio, N'a pas li det croucu.

An viscu, etc.

Soun cant galoi e mounde Au mounde, au mounde, Soun cant galoi e mounde Long-tèms a prevaugu.

An viscu, etc.

A Jano e Guihaumeto, Mameto, mameto, A Jano e Guihaumeto Tambèn an plasegu.

An viscu, etc.

Mai d'abord que fai traço La raço, la raço, Mai d'abord que fai traço, Fasen noste degut.

An viscu, etc.

Aparen lou repaire Di paire, di paire, Aparen lou repaire Ounte nous an pascu.

An viscu, etc.

Urous lou que pòu viéure Deliéure, deliéure, Urous lou que pòu viéure Aqui mounte es nascu!

An viscu, etc.

Se plòu un jour o l'autre Sus nautre, sus nautre, Se plòu un jour o l'autre, Sus éli a plóugu!

An viscu, etc.

Quau laisso soun lengage En gage, en gage, Quau laisso soun lengage Aquéu n'es qu'un vincu.

#### REFRIN

An viscu,
An tengu
Nosto lengo vivo;
An viscu,
An tengu
Tant coume an pouscu!
1906.
F. MISTRAL.

#### LA CARITA

S'aquéu dimenche erias esta à la proumiero messo de Balharguet, d'ausi lou prone que se ié faguè, n'en sarias resta 'spanta touto la semano. O santo de Diéu, coume prechè Moussu lou Curat! N'en parlariéu enjusqu'à deman.

- E sus que prechè tant?
- Sus que prechè? Sus li mal-astre e sus la misèri de la pauro Couletouno, que, pecaire! après uno longo vidasso de trigos, de patimen, de crucifimen se tirassavo pèr carriero aro que lou fiò venié de devouri tout ço que ié restavo; sus la carita, lou plus grand, lou plus sant devé di crestian, pièi de-que sabe iéu? Vous dise que prechè dos ouro de reloge coume jamai de sa vido avié precha e qu'aurias bada e ploura coume lis autre, vàutri tambèn, emai siegues pas de Balharguet.

Mai aquéu que badè lou mai, fuguè lou vièi Croco-cebo. Aquéu, pèr eisèmple, osco! badè. Pièi sourtiguè di proumié, escarrabiha coume un passeroun, risènt en de souto, e sènso mai d'armana, tout galoi, s'enanè querre sa cabro.

— Tè! diguè en la menant à la pauro Couletouno, as agu bèn de mal-astre, vaqui ma cabro, te la doune.

E plus countent qu'uno couquihado au leva dou souleu s'enane durbi touto badanto la porto de soun estable.

Lou vèspre, quand *Durand* trecoulavo, dos cabro que passavon intrèron pèr asard dins l'estable esbadarna, mai quand vouguèron sourti, adessias! tout fuguè barra coume se dèu.

Fau vous dire avans d'ana plus liuen qu'à Balbarguet, lou Curat es pas plus fièr qu'un autre, nourris de poulo, de canard, de lapin e memamen dos cabro. Quand lou tèms di sègo a passa, que siegue dimenche o jour oubrant, douno lou vanc à si cabro que van cerca soun viéure pèr lou campèstre.

De sorto que lou dimenche que parlan, li dos cabro que rintrèron encò de Croco-cebo se capitavon juste aquéli dou capelan.

Aqueste, coume pensas, siguè proun matinié l'endeman pèr veni li reclama.

- Escusas, Moussu lou Curat, diguè lou vièi Croco-cebo, aquéli dos cabro soun miéuno.
- Pèr eisèmple! soun vostro!... e despièi quouro, digas un pau!... E d'abord n'avias qu'uno e m'an di qu'aièr la dounerias à Couletouno.
- Es bèn pèr acò, Moussu lou Curat. Vejan! Diguerias pas aièr, dins voste prone: « Quau baio au paure baio à Diéu? »
  - Si fèt, lou diguère.
  - E ajusterias pas : « Diéu rènd lou double de ço que ié baion ? »
  - Tout acò 's proun verai, mai...
- l'a pas de mai, Moussu lou Curat: ai douna une cabre à Couteloune, lou ben Dién me n'a rendu des. Se i'avias baia li des vestre e que vous n'aguèsse rendu quatre, acè me regardarié pas. Mai pèr aquésti, soun bèn miéune!
  - ... E i'aguè pas mejan de lou tira d'aqui.

(Revira en roudanen e tira « di Conte lengadoucian » de Gustavi Thérond, de Ceto.)

Li fauto dou mège, la terro li cuerb.

#### LA GIBOUSO

#### SIMPLO ISTÒRI

AUZIAS JOUVEAU.



La chato dóu grand Pedurrié Ero gibouso... pèr darrié. La chatouno èro pas devoto; Amavo de courre li voto; Aurié dansa sus d'escarbi; Jougavo i tir, i biribi.

La chato dóu grand Pedurrié Ero gibouso... pèr darrié. La chatouno èro riserello, Mai, pèr malur, trop creserello, E, siegue di sènso mesprés, Li droulas i'èron à l'après. La chato dóu grand Pedurrié Ero gibouso... pèr darrié. Si gènt, de bràvi gènt, pecaire! La proumenavon de tout caire Sèns se douta de quaucarèn: Avien d'iue, mai ié vesien rèn.

La chato dóu grand Pedurrié
Ero gibouso... pèr darrié.
A forço de faire à sa tèsto,
E d'ana courre dins li fèsto,
— Jujas coume li causo van! —
Venguè gibouso... pèr davans.

#### L'ASE

Dins un afaire de di e de redi, la Pegoto, d'Eirago, fuguè, 'mé dos vesino, óubligado d'ana servi de temouin davans lou tribunau de Tarascoun.

Pèr espargna lou camin de ferre, louguèron lou carretoun e l'ase dou Gabian, que fasié paga soulamen quaranto sou pèr jour.

Au tribunau, lou president demando à la Pegoto:

- « Comment vous appelez-vous?
- Mario Chantarot.
- Quel Age avez-vous?
- Nai ges, moussu.
- Comment, vous n'avez pas d'âge?
- Nàni, moussu lou juge : talamen, pèr veni d'Eirago, avèn pres aquéu dóu Gabian, que nous costo quaranto sòu, en lou nourrissent. Demandas à Catarino emai à Janetoun, que soun vengudo emé iéu, s'es pas la verita ».

Li juge, lis avoucat, lou publi, ah! paure, touti se tenien li costo

dóu rire. La bravo Pegoto avié coumprés que ié parlavon de soun ase, dóumaci, pecaire! n'avié gaire gausi de founs de coutihoun sus li banc de l'escolo, en estènt jouino, e, pèr lou francés, ié coupavo.

LOU CASCARELET.

#### DEVINAIO

Qu'es acò: moun proumié, lou doune à mi canàri; Moun segound tèn d'à ment li gàrri; Moun tresen fai jamai refus, dis toujour d'o; Moun tout... Es un saboun: lou saboun Mikadò.

#### COUNVIT FELIBREN

Car e bèn ama Capoulié,
Se dissate que l'anan èstre,
De voste tèms erias lou mèstre,
Agradiéu tant-que me sarié
Se venias, d'un cop de pedalo,
Manja 'mé iéu la cueisso e l'alo
D'un pouletoun gras e daura.
A ma taulo, aquéu jour, l'aura
Dous Mancunen, gai cambarado,
Que, de la Coumtesso adourado,
An dins lou piés l'amour clava.
En pelerin vènon treva
La richo plano de Maiano
E béure, glout, au clar sourgènt
De nosto lengo soubeirano.

Dounc, Capoulié, s'avès lou tèms Venès, vous lou demande en gràci. l'aura peréu noste ami Fassy. Sarié daumage, cap-de-noun! Qu'aquéli fiéu de Lamanoun Vous couneiguèsson que de noum. Vous, lou pilot de nosto barco Qu'a l'ouro d'iuei, fièro, s'enarco Subre lis erso, poujant dre Vers lou calanc que i'aven dre. Vendrés, parai?... Vole bèn crèire Que s'es, Dugat, en Avignoun, L'auren peréu pèr coumpagnoun, Qu'au mié de nautre vendra sèire? Taulo sara messo à miciour. Vous esperan toui dous. Bonjour. Pamens, contro moun esperanco, Se noun poudès avé vacanco. Avisas-me d'un mot subran.

Voste sèmpre vostre, chabrand. Castèu-Reinard, lou 10 de juliet 1906.

#### MOUN GRAND ESTÈVE

(Tira di Memòri e Raconte de F. Mistral.)

Aro fau que parle un pau. pecaire, dou vièi Estève, moun aujou meirenau. Èro, coume moun paire, meinagié sus lou siéu, d'un bon oustau e d'un bon sang : emé la diferènci que, de-vers li Mistral, èron de travaiaire e d'espargnaire e d'acampaire — coume en tout lou païs n'i'avié pas si parié, — e que, de-vers ma maire, inchaiènt coume tout, en aguènt toujour bello ouro pèr ana laboură,

leissavon courre l'aigo e manjavon soun dequé. Moun grand Estève, pèr tout dire, èro (davans Diéu siegue!) un franc galo-bon-tèms.

Emai aguèsse vuech enfant, — entre li quau sièis fiho, qu'à l'ouro di repas se fasien servi sa part e pièi, sus lou lindau, anavon manja deforo emé sa sieto à la man, — autant-lèu i'avié 'no voto, zóu! emé li coulègo s'enanavo pèr tres jour; jougavo, riboutavo tant que duravon lis escut, pièi, souple coume un gant, quand li dos telo se toucavon, lou quatrèime jour tournavo, e alor ma grand Nanoun, uno femo de Diéu, ié cridavo:

« As pas vergougno, arrouino-oustau que siés, de manja coume acò lou bèn de tis enfant!

— Hòu! badau, respoundié, de que vas t'inquieta? nòsti pichoto soun poulido, se chabiran sènso argènt; e, veiras, Nanounet, n'i'aura pas pèr li darrié. »

E' m' acò flatounejant e paupejant la bono femo, éu ié fasié douna ipoutèco, sus lou precàri de sa doto, is araca que ié prestavon au cinquanto o au cènt pèr cènt. Ço que noun l'empachavo, quand venien, l'endeman, lou vèire à la vihado, si cambarado de jo, de faire un brande em'éli davans la chaminèio en cantant tóuti ensèn:

Oh! la poulido vido que fan lis acabaire! Acò 's de bràvi gènt, Quand n'an plus ges d'argènt,

O aquest rigaudoun, ounte s'espoutissien dou rire:

Sian tres que n'avèn pa 'n sòu, Que n'avèn pa 'n sòu; Que n'avèn pa 'n sòu; E lou coumpaire qu'es darnié, Éu n'a pa 'n denié, Éu n'a pa 'n denié.

E quand ma pauro grand se lagnavo de vèire ansin parti, un à cha un, li rougnoun, li farrage de soun bèu patrimòni:

« Hou! bestiasso, moun grand ié fasié, de que ploures? pèr

quàuqui tros de terro? ié plóuvié coume à la carriero... » O bèn : « Aquelo sansouiro? ço que rendié, ma bello, pagavo pas li taio. » O bèn : « Aquelo champino? i'a lis aubre dóu vesin que la secavon coum' un brusc. »

E toujour, d'aquéu biais, l'avié galoio e lèsto. Memamen que disié, en parlant di dardanaire que fan courre la barioto: « Eh! pesqui, sian bèn urous que i'ague de gènt ansin! autramen, coume farian, li degaié, lis acabaire, pèr atrouva de sòu, en un tèms, coume sabès que l'argènt es marchandiso! »

Èro, d'aquéu tèms, l'epoco ounte Bèu-Caire emé sa fiero fasié mirando sus lou Rose. Aqui venié de mounde, pèr aigo o pèr terro, de touti li nacioun, jusquo de Turc emai de Mouro. Tout ço que sort di man de l'ome, touto merço de causo que fau pèr lou nourri, pèr lou vesti, pèr lou louja, pèr l'amusa, pèr l'embula, despièi li pèiro de moulin, li redoundo de telo, li rol de draparié, jusqu'is anèu de vèire em'un gàrri dessus, aqui lou trouvavias, à bèl èime, à tavèu o à fais, dins li grand magasin crouta, souto lis Arc, au barcarés, o dintre li cabano innoumbrablo dou Prat. Èro, coume dirian, em'un coustat mai poupulàri e tout barbelant de vido, èro, touti lis an, au soulèu de juliet, l'espousicioun universalo de l'endustrio dou Miejour.

Moun grand Estève, pensas bèn, mancavo pas talo óucasioun d'ana, quatre o cinq jour, faire tintèino dins Bèu-Caire. Dounc, souto lou pretèste d'ana croumpa de pelvre o de girofle o de gengibre, pèr la prouvesioun de l'oustau, éu partié pèr la fiero emé, dins chasco pòchi, un moucadou de fiéu, car èro un tabacaire, e tres moucadou autre, en pèço, pas coupa, qu'en guiso de taiolo s'envirounavo à la centuro. E'm'acò garlandejavo, tout lou franc jour de Diéu autour di braguetian, di charlatan, di coumedian, subre-tout di bóumian, quand se charpinon e pachejon pèr lou marcandejage de quauque ase rastegue.

Poulichinello emé Rouseto, èro pèr éu, acò, de pourquet emé de sàuvi! i'èro toujour plus nòu; e ravi, ié badavo, en risènt coume un paure, i talounado e bastounado que plóuvien aqui de-longo sus lou prouprietàri e sus lou coumessàri. Bèn talamen que li filoun (e n'i'avié, à Bèu-Caire, poudès vous imagina!) ié tiravon, tóuti lis an, plan-planet, après l'un l'autre, sènso que se revirèsse, tóuti si moucadou; e après, quand n'avié plus, — lou sabié pèr avanço, — desfasié sa taiolo sènso mai de chagrin e se n'en tourcavo lou nas.

Mai pièi quand tournavo à Maiano, emé lou nas tout blu, di mou-

cadou en pèço qu'avien destenchura:

« Anen, ié venié ma grand, t'an mai rauba ti moucadou?

- Quau te l'a di? fasié moun grand.

- Pardi! as toun nas tout blu : te siés mouca 'mé ta taiolo...

— Oh!n'ai pas de regrèt, respoundié lou pataras, aquéu Poulichinello m'a fa rudamen rire! »

En brèu, quand si chatouno (e ma maire n'èro uno) fuguèron maridadouiro, estènt qu'avien de biais e que noun èron degaiado, li calignaire, mau-grat tout, tambén venguèron au sambé. Soulamen, quand li paire ié venien à moun grand :

« Autramen, quant ié fasès, coume acò, à vòsti fiho?

— Quant ié fau? respoundié tout rouge mèste Estève, o grano de viedase! daumage! ié dounarai, à toun drole, uno bello chato, touto abarido e prouvesido, emai encaro i'apoundrai de terro emai d'argènt? Quau li vòu pas, mi fiho, que li laisse: Diéu-merci, à la paniero de mèste Estève i'a de pan. »

Es-ti pas bèn verai que li sièis fiho de moun grand fuguèron touti presso rèn que pèr si bèus iue, emai, càspi, que faguèron touti de ben mariage! fiho poulido, coume dison, porto sa verquiero au front.

F. MISTRAL.

Quau i'es degu se souvèn, Quau dèu óublido,

### LOU RELOGE DOU PARADOU

Er: Rire pleurer.

A-n-un galant pichot reloge, Cresian, li gènt dóu Paradou, De ié faire nòstis eloge, Mai n'en es esta rèn de tout. Se pèr éu sièis biòu di grand' bano An pas courregu dins lou round, Es l'encauso que la campano Dóu reloge brusis pas proun.

Au-liò d'entendre de cantaire Coume i festo de Sant-Martin, Se faire aclama di badaire Jusqu'à dos ouro de matin, Avien dessouto la platano Entendu quàuqui passeroun Que nous an canta: la campano Dou reloge brusis pas proun.

(bis).

Lou relougié à barbo bloundo, Bevènt la verdo aura menti, Disènt qu'à dos lègo à la roundo Sa campano poudié clanti. Ah! se vèn mai sout lis andano, En l'espinchant d'un iue feroun, lé cridaren que la campano Dou reloge brusis pas proun.

Tant-lèu virèron lis agüio Pèr li roudage en mouvemen, Li pastre dins si jargo bluio Van ausi lou son un moumen. Triste, tournon à si cabano, Passon di plus court carreiroun, En chapitrant que la campano Dóu reloge brusis pas proun. (bis).

Lou plus marrit es quand arrivo, l ràfi, dins lou mes de Mars, Lou soulèu acata d'un nivo, De quita trop lèu o trop tard! Se d'acò lou pelot boucano, Au mas asseta su 'n queiroun, Li ràfi dison: la campano Dóu reloge brusis pas proun.

Li tanto de mas, li chambourdo En fasènt sis obro d'oustau, An pòu d'èstre vengudo sourdo, Van is escalié, mounton d'aut. Tout en plegant linçòu e vano, Se pièi l'auson dins si chambroun:

Repetenejon: la campano Dóu reloge brusis pas proun.

Pèr n'en fini di refoulèri, Li counseié Paradounen Volon que sus tres barro en fèrri Siegue avivado dóu Pounènt. Poudra boufa la tremountano E vènt qu'agouton li lauroun : Es fini : jamai la campano Dóu reloge brusira proun.

CHARLOUN RIÉU.

(bis).

La lausenjo fau merita, Pièi la fuge e noun la cerca.

Meno l'enfant emé d'eisèmple e noun emé de counsèu.

### UNO COUMESSIOUN BÈN FACHO

« Vai lèu en Arle encò de l'abouticàri, cerca un clistèri pèr lou pelot qu'es en trin d'acampa si pato, diguè Fefin, la tanto de Parado, à Coulau, un jouine ràfi de 12 an qu'arribavo tout nou dou Martegue, vejaqui l'ourdounanço. »

Coulau encambe la cavaloto, e dins mens d'uno ouro fugue à la

boutigo de moussu Troucho lou farmacian.

« Bonjour, moussu, voudriéu un clistèri.

— Lou voulès prendre ici, o bèn voulès que vous lou porton? Se lou prenès eici, es vint sòu, e, se lou fau pourta, n'èi vint-e-cinq, raport à la boutiho. »

Coulau, que sabié que li gènt d'Arle veson veni li pàuri masié, e que councissié tanto Fefin forço regardanto, respoundeguè que pre-

ferissié lou prendre.

L'abouticari lou fague rintra dins un pichot membre, e dins un

vira-d'ine ié faguè avala lou bouioun pounchu caud à poun.

Noste ràfi n'en revenié pas, mai, vouguent pas avé l'er d'un Martegau que saup ren de ren, acampe un grand chut, pague e remounte à chivau en se demandant de queto maniero poudrié faire prouficha lou pelot dou clistèri que moussu Troucho venié de ié douna.

Aguè pas fa vint pas que se retourno en se tenènt lou vèntre... Rintro coume un uiau encò de l'abouticàri : « Tenès, moussu, vejaqui encaro cinq sòu, mai fasès-me lou plesi de lou metre en boutiho, car sènte que jamai poudriéu lou pourta enjusqu'au mas, n'ai

deja escampa mai de la mita, e lou rèsto èi pas liuen. »

Moussu Troucho, qu'avié vougu un pau rire, riguè, e dounè pèr rèn dins uno boutiho un segound clistèri à Coulau, qu'après avé un pau seca si braio retournè au mas, fièr coume Artaban d'avé tant bèn fa la coumessioun, e de saupre la diferènci que i'a entre prendre un clistèri o lou pourta en boutiho.

Lou paure pichot me la counté en grand secrèt, me fasènt prou-

metre de la garda per iéu; veses que siéu un ome de paraulo.

Cabano, L. VIDAU,

### LA CANSOUN DOU GARDIAN

Ér: Quand lou bouié vèn de lausa... (Bas Carsi.)

> Dins lou grand cèu tout estela Boufo la marinado.

Quand lou gardian vèn ajassa, Li brau de sa manado.

Trovo soun mas despestela E sa femo enanado.

Lou gardian, pale e matrassa, Dins la niue l'a sounado.

E dins soun cor tout treboula Mounto la verinado.

Elo a sourti pèr s'espaça A dès ouro sounado,

E lou pelot qu'a pivela A soun mas l'a menado.

Aqui lou lume an amoussa, La femo s'èi danado.

Mai lou gardian desparaula Embarro sa manado,

Pièi à chivau, encourroussa, Se bouto en caminado.

Au mas de Vers per establa Ven dins la matinado;

'Mé lou pelot que vai cassa Trovo dins la vanado, Courset dubert, descourdela, Touto desbardanado,

Catin sa femo. A bramassa :

« Rosso descaussanado !

- De-vèspre, avans de t'entaula,
   « Auras la pèu tanado!
- « As la civado emai lou sa :
   « Fau fini la journado !... »
- Mai a soun mas sênso parla, Catin s'èi retournado,
- E lou gardian a tabassa La panturlo arrenado.
- Dins lou bouvau a barrula Souto la bastounado.
- Noun s'èi pouscudo ramassa, Li brau l'an embanado.
- Vuei lou gardian destimbourla Sacro touto l'annado,
- E plouro tre que vèi passa Li brau de sa manado.

MARIUS GIRARD

#### JAN TOUTOURO

Jan Toutouro èro proun badalas, coume anas vèire.

Touti li jour, entre qu'avié dina au mas cargavo soun luchet sus l'espalo, e zou! anavo lucheta soun bèn : rintravo pièi pèr soupa quand lou soulèu trecoulavo. Un cop, pamens, que lou manche de soun outis s'èro esclapa en eigrejant uno moutasso de terro que se poudié pas revira, tournè au siéu dins lou tantost pèr cerca un au-

tre luchet, e creiguè de vèire sa femo Naneto se fasènt caligna pèr un de si vesin au dintre de la granjo. Mai coume n'èro pas segur, e que, pièi, se messisavo de rèn, s'entournè mai au champ sènso rèn dire; pamens, acò ié troutavo pèr la tèsto.

Entre que fuguè parti, sa Naneto, que l'avié bèn vist, elo, e que se cresié perdudo, s'enanè vitamen counta l'auvàri à-n-uno de si vesino, Mioun l'Escarrabihado coume ié disien, pèr-fin de ié demanda counsèu sus l'adoubamen d'aquel afaire escabissous.

« A-de-matin, queto soupo as manjado emé toun ome, ié fai ansin Mioun, que venié d'escouta lou lagnun de Naneto?

- Uno soupo de juvert, ié respoundegue aquesto.

— Alor, te soucites de rèn, ma bello, ié dis l'Escarrabihado, me cargue d'arrenja lou tout coume se dèu, iéu: pos tourna tranquilamen au tiéu, toun ome te dira rèn de tout, te n'en doune l'asseguranço. »

Acò disènt, Mioun s'envai tout-d'un-tèms trouva Jan Toutouro que de liuen se vesié tout pensatiéu.

« Hòu! ié crido Mioun dou mai liuen que lou veguè, que? vène lèu emé toun coulègo, qu'ai besoun de dous ome pèr m'ajuda. Zou! que vous espère touti dous. »

Emlacò, d'enterin, brassejavo dou coustat de Jan Toutouro en ié fasènt signe.

Aqueste, qu'èro soulet, boulegavo pas mai qu'un terme: se cresié que noun èro éu que Mioun sounavo ansin. Entandóumens, l'Escarrabihado brassejavo que mai en sounant sèmpre de-vers Jan Toutouro. A la fin, pamens, aqueste se decido de ié crida, en anant tambèn à soun rescontre:

- « Mai siéu soulet, Mioun ; i a res emé iéu : de-que diàussi me vos? »
- Coume? siés soulet! N'en vese pamens un autre emé tu! Que me cantes aqui? ié rebèco ansin Mioun.
- Veses bèn que siéu soulet, ié fai Jan Toutouro, en ié venènt contro, siéu bèn soulet, regardo!

- Hoi! tè! es verai, pamens! diguè Mioun. Ah!... vese aro l'encauso de ma barlugo! Ai manja de-matin uno soupo de juvert, que sèmpre fai vèire double; ié pensave plus, escuso-me Jan Tourtouro.
- Coume ? de-que dises, Mioun, as manja 'no soupo de juvert que fai vèire double ?

— E o, lou sabes dounc pas, Jan Toutouro, que quand pèr lou dina ayès manja 'no soupo de juvert, ié vesès double enjusqu'au

soupa? Acò se saup proun, pamens!

— Eh! bèn. fas bèn de me lou rapela, Mioun: iéu que l'avién oublida! » ié respoundeguè lou bedigas en risoulejant (voulié pas que sa vesino, qu'èro uno barjaco di bono, veguèsse que noun lou sabié, qu'autramen l'aurié di en touti e se sarien trufa d'éu); e, au dintre d'éu, se faguè ansin lou badalas: « Ah! vaqui perqué m'imaginave, iéu, que ma femo Naneto noun èro souleto aqueste tantost! Coume tout s'apren pièi, pamens! »

LOU CASCARELET.

### LA MARGARIDO DE PRAT

Mignoto blanco, e fresco margarido, Se dis que tu fas counèisse l'amour, E que lou tonstèms que rèstes flourido Pèr lis amourous l'aura ges de plour.

Quan noun lou creirié? Es un rai d'estello Qu'esbrihaudo autour de toun flame cor, E li labro en fiò de la jouvencello, Largon si poutoun i floureto d'or.

Pradarié maienco de-z-Ais de Prouvênço.

Lou Chapòli di poutoun.

### BÒNI RESOUN

Pèr Oskar Andersen.

Aviéu un ouncle qu'èro avouat de soun mestié; es mort, pecaire! i'a bèu tèms; ame de crèire que Diéu l'a rejoun en soun sant Paradis, emai Roumieux nous ague counta que, pèr n'en faire sourti Jarjaio, ni sant Pèire ni sant lves pousquèron jamai destousca ni avouat ni ussié dins tout lou relarg sacra. Aqueste miéu ouncle èro forço courtés de sa naturo, mai, se de-longo tenié bon gàubi, emé tout brave venènt, entendié que lis autre lou paguèsson en memo mounedo, e fasié ges de bestour pèr regibla si clavèu en quau que fugue voulènt p..., de-qu'ère pèr dire? noun, se vous agrado, canta plus aut que li vióuloun.

Adounc un beu jour se presento au siéu gabinet un tras-que magnifique segnour, aut sus cravato, finamen penchina, rasa de fres, ganta de meme, vesti coume uno gravaduro de modo, e coume elo pourtant rede lou cors emai aut lou cap: « Moussu, ié ven ansin, es proubable qu'aves pas l'ounour de me coune isse?

— Tout l'ounour es pèr vous, Moussu, » part quatecant la replico, rapido e fusanto coume uno vero. D'abord un pauquet estouna, lou pleidejaire repren alen e debano soun noum, que dise? si noum, car n'avié à boudre: « Eh bèn! siéu lou marqués de Chaparihan de la Tourre dou Besau de Mount Goufié de la Clapeiredo d'Arpenticarouvagna! » e, aguènt majestousamen martela e mastega caduno di silabo ufanouso, se pausè, superbe, pèr vèire l'efèt proudu sus moun ouncle.

L'efèt se manifestè senso tardiero:

- » Eto! Moussu, beu noum per l'estiéu!
- De-que voulès dire?
- Es que li gènt an peréu lesé de vous nouma parié dins l'ivèr? li journado sarien trop courto! »

Lou marqués, au founs brave ome, noun pousque s'engarda dou rire, pièi debanè pausadamen l'afaire que l'adusié vers moun ouncle, e se quiteron li meiours ami dou mounde.

LOU CASCABELET.

Tres passeroun sus uno espigo Noun se podon jamai nourri, E tres garçoun près d'uno fiho Jamai se podon tempouri.

# UN BON COUNSÈU

Lou paire — que l'es afa — Meno si drole à l'escolo... l'a fa cènt fes, e refa, Si plagnun di calour folo:

- « Vuei, l'auro a mai pas boufa
- « Lou soulèu vous amassolo...
- « Li camin blanc soun caufa
- « E poudès plus tira solo...
- « Di toufour venènt di colo
- « Li cor n'en soun estoufa...
- « Li rai sus li cabassolo
- · Toumbon à vous esbroufa... »
- « Pèr bousca lou fres qu'assolo,
- « A noste age, qu'aurias fa ?.. »
- « léu, auriéu placa l'escolo E dins Vèuno auriéu gafa... »

J. MONNE

# CANTADISSO DI MASIÉ I GRÀNDI SANTO

Èr: O Magali...

O gràndi Santo pouderouso, Benesissès d'eilamoundaut, Nosto feloupo pietadouso Vengudo dins voste fougau.

O gràndi Santo, ausissès dounc Nosto preguiero; Santo, fasès plòure d'amount Voste perdoun.

Que li blad fagon mai dóu double, E li maiòu forço rasin, E que s'engraisson lis anouble E prengue briéu lou cavalin.

O gràndi Santo, etc...

Que dins l'avé carga de lano Bèn s'atèsson lis agneloun, Que li biòu aguson si bano I tres pouncho di ficheiroun.

O gràndi Santo, etc...

Que li luserno e li civado S'amoulounon dins li granié, Que lis óulivo bèn couffado A noun plus cargon l'óulivié.

O gràndi Santo, etc...

Fague de pan plen la paniero E de bon vin plen li barrau. E de bos plen la bouscatiero, E plen de vièsti dins l'oustau.

O gràndi Santo, etc...

Que li bèlli flour de la Vido, I raiado d'or dou soulèu, A nòstis iue, bèn espelido, Fagon lusi l'amour dou Bèu. O gràndi Santo, etc...

Que la lengo de nòsti rèire Clantigue en milo nòbli cant. E que la coupo di sant crèire Sèmpre abéure li païsan!

O gràndi Santo, ausissès dounc Nosto preguiero ; Santo, fasès plòure d'amount Voste perdoun.

ANTÒNI CHAMP-ROUS.

### LI PESSÈGUE

Lou gardo-campèstre de Fountaniho, Bourtoumiéu, passavo pèr avé li det fa 'n pau en cro, bèn tant que d'uni que n'i'a, — s'atrovo pertout de marridi lengo, parai? — à soun escais-noum de *Mourracho*, que tenié de soun paire, apoundien la qualita, o lou titre, coume voudrés, de gardo-raubo.

l'a d'acò pèr lou mens quinge o sege an, un vèspre d'estiéu, vers li quatre ouro, en fasènt sa tournado au quartié di Cadeniero, pèr dessus lou canau, Bourtoumiéu passè sus lou bord d'uno terro ounte tres pesseguié aubouravon dins lou cèu de pessègue rouginas que prenien pèr l'ine.

Uno envejo moustro ié venguê de saupre s'èron autant bon, aquéli pessègue, coume n'avien l'èr.

S'avancè plan-plan de l'aubre qu'èro lou mai proche dou carreiroun. Espinchè de drecho, de gaucho, d'en aut, d'en bas, e, noun vesènt dins la vesinanço amo vivènto, mandè la man à-n-uno branco. Tastè 'n fru: uno melico! N'en tastè 'n autre: oh! que perfum! oh! queto aigo! Talamen lis atrouvè de soun goust, li pessègue, que n'en garniguè soun carnié, eto!

· Mai, au champ, quau es segur d'èstre pas vist, quand vou faire

quicon d'escoundoun? Coume lou Mèstre l'a di :

#### Li bouissoun an d'auriheto.

Quand es pas d'auriheto qu'an, li bouissoun, es de luseto.

Amaga darrié 'no sebisso d'agrenas, Charlet dou Pelle, que li gent dou Gres an subre-nouma lou Mut, justamen per-ço-qu'a lou fielet ben coupa — noun perdié de visto li mouvemen dou gardo, e lou leissavo faire senso n'en boufa uno.

Quand Mourracho, countent de sa pousito fugue sourti de la champino. Charlet s'aprouche d'un dis aubre fruchau, e, tout en virant l'esquino au defensour de la prouprieta, se boute peréu à culi de pessègue, e n'empligue li dos pochi de sa blodo.

Lou gardo, qu'èro panca liuen, l'entènd, lou vèi, ié part dessus,

l'arrapo pèr lou bras :

« De-que fas aqui, tu?

- léu? pas rèn.

- Coume, pas rèn? Apelles acò pas rèn! Ah! pèr ma fisto! Mai n'as dounc ges de vergougno, un ome de quaranto-cinq an, un prouprietàri! de faire ansin lon travaire de champ? En que pènses, malurous?
  - Fasiéu pas grand mau...

— Pas grand mau! pas grand mau! Atroves? Eh! bèn, alor, l'ami, sabe plus ço qu'es, iéu, de faire mau! Ah! pèr eisèmple!

« Escouto, vas veni emé iéu à la coumuno, beisa lou patin. Veiras un pau ciça se moussu lou Maire te baiara 'n image! Pièi lou mounde se plagnon que se pou rèn abari au champ, e meton l'escampo sus nautre, li gardo-terro, que fasèn pas, sèmblo, noste service coume se dèu. Eh! bèn, fau que lou mounde sachon finalamen ounte soun li laire, li roudaire, li maufatan. Aro que te tène, coulègo, te lache plus. Daut! marcho! »

E, tièr de sa caturo, Mouracho menè Charlet dou Pelle. Aquest, tèsto souto, se leissè faire, e touti dous ensen s'acamineron de-vers la vilo.

Arribon à la coumuno, intron. Justamen, lou conse, En Clavèu, se ié capitavo.

Lou gardo s'avanço de soun capo, qu'èro asseta dins soun gabinet, ounte signavo lou courrié de la journado.

- « Bonjour, moussu lou Maire, fai, sourrisènt, en pensant i felicitacioun que l'anavon reveni, vaqui un ome qu'ai arrapa dins la terro de Manjo-Gàrri, amount i Cadeniero, en trin de desfrucha 'n pesseguié.
- Oh! oh! Charlet, faguè moussu Clavèu, en cabessejant em'un èr de reproche e de tristesso peirenalo dóumaci, bravas qu'èro, amavo pas de chagrina lou mounde es-ti poussible que tu, Charlet, un travaiadou, un paire de famiho bèn vist dins l'endré, t'oublides en de causo que soun pas de faire? Mai, santo de Diéu! en quau faudra se fisa, se d'ome de ta meno se bouton à mau-traire! »

Alor, ufanous, Bourtoumiéu apoundeguè:

« Digas-ié 'n pau, moussu, que sorte ço qu'a rejoun dins li pòchi de sa blodo. »

Lou paure Pelle fague ço que i'ero coumanda: tire, uno à cha uno, de soun escoundudo, quinge aubergo, qu'arrengueire sus lou bureu dou sendi, permié li letro estalouirado, en disent:

« Es verai que lou gardo m'a destourba, coume culissiéu aquéli fiu. Mai pamens, meussu Clavéu, noun crese d'avé rèn fa contro la lèi... — Coume, malurous que tu siés! coupè lou conse endigna, troves alor que de rauba dins lou campèstre, ço que d'autre an fa veni de sa susour, acò s pas manca la rego? Mai quétis idèio as aqui de la prouprieta, moun enfant?

 Avès resoun pèr ço que regardo lou bèn dis autre, moussu lou Conse, e siéu bèn d'acord emé vous aqui dessus; mai pènse

pas que degun me posque bleima d'agué culi mi pessègue...

- Ti pessègue, dises?

- Eto, pardine! d'abord que la terro de Manjo-Gàrri, ounte soun li pesseguié, iéu l'ai croumpado i'aura tres mes vèngue dimenche, coume pode vous lou prouva pèr l'ate qu'ai au mas. E i'ai paga finque d'uno dardèno si bèu quatre cènt setanto-cinq franc, à Manjo-Gàrri, pèr dos eiminado e miejo coume nous fau mouri un jour.
  - As croumpa la terro de Manjo-Gàrri ?

- Justamen.

- Aquelo di Cadeniero ?

— Aquelo di Cadeniero, toucant la cabano de Jan Grand-Braio... Bessai, d'acò-d'aqui, n'avié pas doutanço, lou brave Mourracho, faguè Charlet, en se virant dóu caire dóu gardo, que, sentènt veni la mau-parado, coumençavo de se faire pichoun.

— Verai Charlet, ignourave que la terro fuguèsse tiéuno. Mai tambèn, que diàussi ! auriés pouscu me lou faire assaupre pulèu, qu'au-

rian pas fa tóuti dous uno cambo lasso.

— Pas tant badau! D'abord me l'avès pas demanda. E pièi, teniéu à me trouva 'mé vous en presènci de noste segne maire. Adounc, moussu Clavèu, sènso vous coumanda, e en gardant lou respèt que vous dève, voudrias-ti prega lou gardo de vous faire vèire, à soun tour, sa recordo, e de vous dire ounte es que l'a rabaiado?

Sus aquelo dicho, lou paure Mouracho venguè de tóuti li coulour. Mut de la vergougno, sentènt pesa sus éu lis iue dóu mèstre, que galejavo pas sus aquéli causo, sabié plus coume se teni, e vouloun-

tié se sarié foura dins un trau de fournigo.

Moussu lou sendi, la voues tremoulanto de maliço, ié diguè :

- \*« Eh! bèn, Bourtoumiéu, avès entendu la paraulo de Charlet?
- 0, moussu lou Maire.
- Adounc, vujas vite aquéu carnié, que sachen de-que tèn ».
   Fauguè bèn fini pèr se decida.

Em'un souspir que sourtié dou prefound de sa courado, lou gardoterro virè de mourre-bourdoun soun carnié, d'ounte barrulèron vinte-dous beu pessègue sus lou burèu.

« E alor, faguè lou conse, aquéli fru vènon tóuti dou memeraubre? »

Bourtoumiéu, blanc coume un pedas, n'aguè pas la forço de respondre, mai beissè la testo coume un coupable qu'èro.

Vue jour après l'aventuro que vous vène d'escudela, quatre mot don prefèt de Marsiho, cra, cra, arribèron à la coumuno, e lou gardo Mouracho faguè la resquiheto e rendeguè soun kèpi.

Coume dis lou prouverbi, tau crei de guiha Guihot, que Guihot lou guiho.

12 d'outobre 1905,

AUDOLARD MARREL.

### SUS L'IERO

Au mitan de l'eiròu, dre coume uno alabardo, S'aubouro lou menaire emé soun fouit en man, Couchant lou cavalin que reniflo, escumant, Dins uno póusso d'or, au souleias que dardo.

Dins sa courso, dírias que l'astre-réi s'atardo, Lou jour n'a ges de fin, e lis ome, trimant, Pér devina lou têms que pôu faire deman, Regardon, peralin, la travésso bouchardo. La sóuco a fa soun obro, — e lou soulèu peréu : L'ourizoun rouginas aparèis davans éu. Li caucaire soun las, rendu, mai noun renòsi;

E quand l'astre dóu jour dins un brasas se trai, Éli se drèisson, fièr, agouloupa de rai, E bèu coume d'eros dins uno apouteòsi.

AUZIAS JOUVEAU.

Tira de Gran de Beuta, recuei de sounet que vai parèissse.

Quau noun saup qu'uno cansoun Noun gagno qu'un picaioun.

### DE BON MATIN ME SIÉU LEVA...

Cansoun poupulàri.



De ben matin me siéu leva A la fresco matinado Pèr mis amour cerca Sènso lis avé troubado, N'estènt forço lagna. Ai tant cerca e recerca Qu'à la fin l'ai destouscado, Dins soun jardin eila Sourrisié, touto pimpado, Amirant sa bèuta.

- Bello, ai passa la niue, doufent,
   Trevant per draio e per orto,
   Esperant lou moumen
   Que se duerbe vosto porto,
   Per fini moun tourment.
- Moun bèl amant, jusqu'au matin,
   M'embarrè moun segne paire.
   Noun vòu dins soun jardin
   Amourous ni calignaire,
   Bèl amant, que pegin!
- Se voste paire me vòu pas,
   M'enanarai vers lis Indo
   O bèn, de moun trepas,
   Ausirés lou clar que dindo...
   Bello amigo, à-Diéu-sias!
- Ah! moun bèl amant revenès
  Dins lou jardin de moun paire,
  S'es, moun paire, en travès,
  léu lou dirai à ma maire,
  Bèl amant, revenès!
- Reculi e transcri pèr jan malan.

Tira de Prouvenço!)

Jamai sant de païs a fa miracle.

Ventre plen porto li cambo.

#### LI CAIETO

Bèn cuech à poun à la broucheto, Li]lipet lauson]lis aucèu. Enviroutado]en cabedèu, Peréu li tripo fan lingueto.

Tout acò vau pas.li caieto: Fege, juvert, ratello, lèu, Aiet chapla qu'un fin moussèu De crespino ensèn empaqueto.

Pièi se l'apound pebre emai sau. Lou girofle noun ié vai mau, E se bouto au fiò dintre uno oulo.

Bèn lèu s'en escapo un perfum Agradiéu e que reviscoulo : Adeja vous chalas dóu fum.

LOUIS CREST

### PACIÈNCI

Un brave grangié de Mournas, qu'èro dins lou siéu, aganté 'n jour un marrit mau que lou matrasse proun tems e que lou fague pièi cabussa dins la toumbo. Ero jouine encaro, e, dou tems de sa malautié, prengue coume ajudaire un jouvent de si vesin, proun poulit ome que ié disién Paciènci, e que devoutamen menavo soun ben en soun lioc e plaço.

L'endeman de l'enterramen, la pauro véuso, adoulentido, se descounsoulavo dins soun oustau; fasié peno, e, li vesino, inquieto, anèron souna Moussu lou Curat pèr que l'ome de Diéu venguèsse ameisa la malurouso. Lou brave capelan, la vesènt ansin lagnouso e despouderado, ié diguè en intrant dins la granjo, emé soun tetadous d'apoustòli : « Anen, ! Madamo, sigués plus forto dins lou malastre : voste ome, segur, coume un brave crestian qu'èro, s'atrovo dins lou cèu pèr aro, e, quand pèr vous, l'ouro picara pièi, lou veirés encaro dins lou Paradis, vous n'en doune l'asseguranço; qu'aquelo santo idèio vous assole : d'enterin, Madamo, agués paciènci, prenès paciènci, paciènci..... »

Au mot de paciènci, la véuso subran chaurihè, e, dintre si lagremo faguè plan-plan au digne prèire : Coume ? Moussu lou Curat,

Paciènci vous n'aurié deja parla? »

LOU CASCARELET.

### DEVINAIO

De-qu'es acò? de-qu'es acò? A cinq os, cinq alo, uno co.

(La nèspro.)

Ma maire m'a fach en cantant, Siéu tout vesti de blanc, N'ai ni tèsto ni quiéu, Ni bèsti nimai ome siéu.

Un iou.)

Ai ges d'ine, ges de man, ni telo ni pincèu, Ni coulour, ni papié, ni creioun, ni pastèu, Pamens de tu farai un retra bèn fideu.

Un mirau.

# REMEMBRANÇO

T'en souvèn, quand, dins lis alèio Que vènon jougne Camp-Cabèn, Touti dous legissian Mirèio, Souto li roure dou castèu?
Nostis amo ensèn coumuniavon, E dins aquel amour d'enfant, Quand nostis jue se rescountravon Deja, se disien: A deman.

E quand culissian de floureto Dins li draiolo, aperalin, Èro lèu pleno, ta faudeto, De margarido e gau-galin. De moun bonur ères urouso, E se vouliéu prene ti man, Clinaves lis iue, e, crentouso, Me disiés: Li prendras deman.

T'en souvèn, d'un jour qu'un aurige Nous sousprenguè dedins lou bos? Li tron fasien grand treboulige, E nous bagnerian jusqu'is os. Dins toun esfrai, vers iéu, chatouno, Te sarrères en tremoulant; Vouliéu te faire uno poutouno, Mai me diguères: Noun, deman.

T'en souven d'aquéu sounjo-fèsto, Un farlouquet, vesti de nou; S'èro-ti pas mes dins la tèsto, De t'enmena de Castèu-Nou! Pèr te vèire faguè lou viage, Arribè fièr coume Artaban, Mai, quand parlè de maridage, lé diguères: Vendrés deman. T'en souven, di belli vesprado Ounte nous parlavian d'amour?... D'aquélis ouro benurado, léu, me n'en souvendrai toujour. E quand à ta maire tant gento Anère demanda ta man, Prenguères li miéuno, e risento: Noun plus diguères: A deman.

ACHILE VIDAL

Avignoun, lou 6 d'Avoust 1906.

Vau mai chauma que mau moure.

### PAURE MEDOR!

l'a ussié em' ussié, coume dison que i'a balaus e balaus. Mèste Agasso, qu'èro ussié à Sant-Pau-di-Courcoussoun, qu'acò s'atrovo souto Ventour, èro segur lou pus ahissable e lou mens poupulari de touto l'encountrado. Plat coume uno punaiso davans li riche, arrougant emé li mesquin, èro senso pieta pèr la pauriho. Laid coume pecat, grela coume un draiet, michant coume la galo, èro toujour pèr orto, e aurié fa sesido à si gènt, s'èro pas que lis avié jamai vist, estènt un bascarot de Carpentras.

Un jour qu'estrumentavo, coume disié, encò dou brave Micoulau, e que fasié vèndre au paure diable si quatre nipo dins l'escour dou mas, Medor, lon chin de l'oustau, enfeta de si vai-e-vèn, d'aquelo estaladouiro de pastiero, de peiròu, d'èrpi e d'araire, remiéutejavo desempièi uno passado, quand pièi perdeguè paciènci en ausènt Agasso brama en franchimand: « Une fois, deux fois, trois fois, à Jóusè! » Suseto, que plouravo coume uno Madaleno,

aguè bello à ié crida : « Medor ! Medor ! » Micoulau aguè bello à lou sibla, à ié brama : « Vène eici, Medor ! » rèn ié faguè, Medor se bandiguè subre l'ussié e, flan ! un bon cop de dènt i boutèu !

Ah! de-que faguères aqui, paure chin, paure Medor! Quaranto jour après, fauguè, bèn à regrèt, ié larga un cop de fusiéu... Aquelo mourdeduro i'avié douna la ràbi!

Paure Medor, pauro bravo bèsti! Acò t'aprenguè de mordre la car d'un ussié!...

Cabano.

L. VIDAU.

### LA MARTINO

O santo enfanço! Urous matin! Avian uno vièto vesino, Coume èro véuso d'un Martin, Li gènt ié disien la Martino.

Èro maigro coumo un clavèu, Laido coumo un pecat, mau facho; Lis an l'avien tana la pèu, E se pagavo de moustacho.

Justamen, de-fes, à l'oustau, Au brut de la molo que viro, Se parlavo de l'inmour!au Cantaire de la douço Elviro.

— Ah! Lamartino, que cervèu! Queto amo celestialo e puro! Si cant sarien sèmpre nouvèu, Coume li flour dins la naturo. l grand jour de quaranto-vue, Quand nous cresian tóuti de fraire, La Franço entiero avié lis iue Sus lou gèste qu'anavo faire.

Avié rèn qu'à leva la man Davans li vilo o li cabano, Pèr endiga lou flot uman Desbardana subre li plano.

Pourtavo lou drapèu sacra; Èro un di gigant de l'Istòri; Lou pople qu'avié celebra lé marchandavo pas la glòri.

Mai l'iéli perdié soun prefum, L'abiho mourié sus la souco, L'oumbro toumbavo, e l'amarun Venié lèu à tóuti-li bouco.

Lamartino avié plus vint an ; Soun front s'ero frounci de rido : Mounte èron sis amour d'antan, Tout embeimado e tant flourido ?

Soun cor saunavo de doulour. Vido crudèlo! mort jalouso! Quau poudié legi sènso plour Si *Counfidènci* pietadouso? —

Escoutave, tout pensatiéu, Lou det sout la tèsto que clino, E sus sa porto, quand sourtiéu, Cercave dis iue la Martino.

Se s'enanavo, sout li pin, Emé sa fauciho embrecado, Faire un pau d'erbo à si lapin, Seguissiéu pèr orto si piado. Un matin, coume erian soulet, Asseta souto uno baragno, Dintre tèms que lou ventoulet S'amusavo à seca l'eigagno,

lé diguère sout moun capèu, Tout en la regardant de caire : « Qu'avès fa de voste drapèu ? M'avise que lou sourtès gaire!

Un drapèu? me faguè, Luroun!
Mai quete drapèu me vos dire?
Lou drapèu sacra, sabès proun....
E la pauro vièio de rire.

Me teisère un moumenet; pièi:
« Cantas-me quaucarèn, vesino.
— Cantan plus, quand se fasèn vièi, »
Me respoundeguè la Martino.

Li pin avien l'èr de prega; Li rai dansavon dins la draio. Alor, sus l'erbeto alounga, lé prenguère li man, la taio;

Sarrère si det tremoulant Qu'avien fa tant de bèlli cavo; Moun regard se pausè, plan-plan, Su sa barbo que m'estounavo,

E souto li branqueto en flous, Davans lou cèu, dins lou silènci: « Perqué sian rèn que nàutri dous, Fasès-me vòsti counfidenci... »

CLOUVIS HUGUES.

Embrun, lou 2 d'avoust 1906.

Quatre iue veson mai clar que dous.

#### LA COUNFITURO

L'autre dissate, ma vesino Martoun lavavo lou sou de sa cousino, e soun pichot Marius (vèn d'avé quatre an) anavo, venié, barjavo, — l'enfetavo.

« An, tè, moun drole, ié fai Martoun, vène gousta, qu'es quatre ouro. »

Assèto soun nistour sus lou lindau, ié baio un pichoun pot ounte i'avié 'ncaro un pau de counfituro de coudoun, em'un tros de pan.

« Tè, manjo, e tèn-te tranquile. »

Marius, qu'amavo li sucrarié, coume touti lis enfant, fuguè lèu atala.

Au bout d'uno passado crido:

- Mama!
- Dequé vos?
- La tounfituro, a d'auriheto?

La maire, forço óucupado à soun pres-fa, ié respond :

- Eh! o, moun drole, a d'auriheto.

Un pau après:

- Mama, la tounfituro, a de pateto?
- Hèi me vènes en òdi... O, a de pateto la counfituro. Manjo, vai! Uno minuto après :
- Mama!
- Oh! quet enfant! Dequé i'a mai, vejan?
- La tounfiture, a 'no couete?
- 0, moun enfant, a 'no coueto.

Pamens, Martoun, que tant de questioun tafuravon, s'aprounché dou bonjarroun per saupre dequé viravo, e, pauro! metegué li man sus la testo, en cridant, de veire soun fién qu'èro en trin de grignouta sabés dequé? uno ratouno... counfido.

Tira dou journau Prouvenço.!

LOU CASCARELET.

### PÉUSSET

Lou courre d'Arle es long: aguènt landa cinq lègo. Péusset, pèr alena, s'arrèsto tout relènt; E la man au seden, dre-quiha sus soun ègo, Es bèu coume un Crousa davans Jerusalèn.

Dins un mountéu fangous a larda sa fichouiro, Pèr miés aplanta l'ègo endihanto que fai Peta la narro au vent marin carga de mouiro. Lou cavalin camargo eissejo sout lou fais.

Sus lou païs santen lou soulèu plòu arrage, E se vėi de pertout eigreja de mirage, Péusset esperd sis iue sus lou magi relarg;

Pièi, reprenènt soun ferre à la man, esperouno L'ègo que coume un lamp cavauco dins lou clar... Uno espouscado d'or e d'argènt l'envirouno.

MARIUS JOUVEAU.

# LOU PROUMIÉ POUTOUN

T'aviéu tout douna dins uno poutouno, Moun proumier amour, mi raive flouri, Vuei m'as tout représ, e ploure, chatouno, T'aviéu tout douna dins uno poutouno, Aro que m'enchau, n'ai plus qu'à mouri.

Mai te fachariés, o ma touto bello, Pèr un pichoutet, tout pichot poutoun, Que souleto an vist d'amount lis estello; Mai te fachariés, o ma touto bello, Sabes que n'erian que dous enfantoun! Vole plus mouri, ta bouco es risènto, Quand l'on s'amo ben i'a ren de plus dous, Un poutoun, que vos? es causo inoucènto; Vole plus mouri, ta bouco es risènto, Pèr me benura, n'en fau au mens dous.

ACHILLE VIDAL.

### SIAS PROUN PAGA 'NSIN

Un qu'avié tua un loup n'adusiè la pèu à la coumuno pèr n'en touca lon prèmi counvengu. Avans de douna li sòu, lou secretàri, curious coume n'i'a de-fes, jé demandè de jé counta un pau la revirado d'aquelo casso fèro.

« Me devinave, bèn siau, au miéu, diguè l'urous cassaire, quand subran, de deforo, ausiguère crida au secours : agante vitamen moun fusién e sorte tout-d'un-tèms. Ero ma sogro, pecaire! qu'un loup espetacious agarrissié e qu'au son rangoulejavo, la pauro! Senso perdre uno minuto, ajuste lou bestiàri, e pan! pan! ié mande quatecant mi dous cop de fusiéu entre lis jue : l'estènde rede. Mai fuguère pas proun lest; quand arribère per auboura ma sogro, la malurouso fasié si darrié badai : lou loup l'avié tranca la gargamello.

- Eh! ben, mancas pas de toupet, moun ome, ié fai alor lou secretàri! Coume? avès lou front de reclama lou prèmi, quand aquéu brave loup vous a tant poulidamen desbarrassa de vosto sogro! Vous

dève rèn de tout, que sias proun paga 'nsin! »

LOU CASCARELET.

Noun metes vin nouveu dins un ouire que sent l'eissu.

### SOUNET PACAN

#### MIEJOUR!

Es miejour! — Dóu soulèu, coume uno font pourpalo, Rajo de flamo roujo e de belugo d'or! La vièio danso!.. E sout li sause de la calo, Mita-nus, lou bouié chourlo un cop... pièi s'endor?

Tepo, flour e fuiun aro, tout pènjo l'alo, Rabina de calour, tout nous semblarié mort, S'èro pas que s'ausis lou zounzoun di cigalo. Cansouneto de pas qu'ensoumiho li cor!...

Pièi, lou ventoulet boufo... e, tourna-mai la joio Fai clanti lou campèstre ounte tout èro siau! Es un grouün de gènt, que van, l'amo galoio,

Coume l'abiho au brusc — au travai, plen de gau, Reprenènt, courajous, li man atravalido, L'eterne e grand coumbat de l'Amour... de la Vido!

Bèu-Caire. Antòni berthier.

#### AME MAL!

Vau mai èstre aucèu de champ qu'aucèu de gàbi. Prouvèrbi.) Pour rivre heureux! vivons caché!

Ame mai maneja la trenco o ben l'araire, Ame mai tout lou jour m'enchuscla de souleu. Pièi tourna vers moun nis ébri de cant nouveu, Que d'estre embarraia de-longo emé de laire!...

Ame mai di tavan e di grihet quilaire L'agradiéu paraulis, lou vounvoun bressarèu! Di cigalo ame mai lou cant dous coume mèu, Que l'enfetant jargoun d'un franchimand trufaire!... Ame mai demoura toustèms pauro luseto, Viéure soul escoundu, crentous, dins la sauseto, Que d'èstre parpaioun i man di margoulin!...

Ame mai me clina, ve, pèr fouire la terro Ame mai manteni moun amo llbro e fiero, Que de me rebala davans de rampelin? Bèu-Caire.

# DIFERÈNCI

- « Queto diferènci i'a, Gricò, entre un chin e un cat?
- Entre un chin e un cat?
- -0.
- Bèn, lou cat, Louiset, casso de gàrri, e lou...
- Vagues pas cerca tant liuen, moun ome. Veici: i'a ges de cat que fugon esta chin, mai i'a proun de chin que soun estaca.

LOU CASCARELET.

### VIHADO

Aro, dins moun chambroun, d'abord que la flamado Abraso lou fougau E que lou vênt-terrau sout la porto barrado Escoubo lou lindau;

En regardant la niue que davalo sèns luno Sus lou vèspre arlaten A la póusso dóu tèms que mounto e revouluno En tóuti li cresten, Me sounje: se de-fes uno man enaurade, Uno pichoto man, Turtavo en tremoulant la cadaulo toumbado E l'aussavo plan-plan,

Se vesiéu s'avança de la porto badanto Au mitan de l'oumbrun, Lou riban de velout, la capello boumbanto E lou carage brun ;

Segur, mau-grat l'ivèr e lis aigo jalado En téuti li valat E lou vènt-d'aut boufant la fre sus li calado E lou cèu estela,

Au mitan dou chambroun veiriéu li rai de l'aubo Amoussa moun calèu, Coume s'elo venié, dins li ple de sa raubo, Adurre lou soulèu.

« Chato, diriéu, tu qu'amourous, à la perdudo, « Dóu mitan de ma niue,

« Sounave, à la perfin de-vers iéu siés vengudo « E t'ai davans mis iue.

« Vai, li Santo de Diéu te seguiran pèr orto! « Mai, bravo, dóu lindau

« Esvartant lou pantai, viro-te de ma porto « Au camin de l'oustau. »

Un jour, en estènt vièi, quand dóu tèms de la vido Noun rèsto qu'un rebat, En me repassant tout dins ma tèsto ravido

Coume un sounge acaba,

Dirai : « L'ai couneigudo. Ero talamen bello « Qu'en ié cantant mi vers, « Vesiéu li roso s'espeli sus sa capello

« A la fre de l'ivèr. »

E belèu me creirai dins ma tèsto brandanto Que, flourido d'amour, Elo s'envai, couifado, eternamen galanto, Sus la lisso en coumbour.

JÓUSÉ D'ARBAUD. Tira dóu *Lausié d'Arle*, en preparacioun.

# A LA BONO APOUSTOULICO

N'i'a que dison: « Osco l parlas-nous d'acò! Li grand de la Republico soun pas fièr: li vesèn, en tèms d'eleicioun, se touca la man e turta lou got emé li darrié de soun vilage, e d'èstre coutrìo emé li rèi, lis empacho pas, quand casson ensèn coumpaire e coumpagnoun, de pourta 'n capèu de paio enclouta coume un simple païsan de Mountelimar o un brave vigneiroun de Gascougno. Me parlés pas d'aquéli bedigas que de ço qu'an fa lou viage de Paris pèr ié pourta uno carretado d'ourtoulaio o uno banasto de lapin, s'entournon emé la faquino e parlon francés à si pichot... »

Toustèms l'a agu de gent d'esperit e à la bono apoustoulico. Lou paire de ma grand éro lou fraire de la dóu du de Canto-Perdris. Acò n'èro un, de brave ome e de sabentas, e pas fièr, emai trevèsse lou rèi, la rèino e quan saup quant de princesso! Pourtavo belèu pas de capèu de paio enclouta, mai dison que pourtavo si capèu à tres lume tant que tenien lou cop, emé de roupo à ramage que se n'en councissié plus la conlour. Fasié veni sis equipage de si terro, sènso s'enchaure de sis arnés à l'antico e dóu rouvi que li manjavo.

Quand siguè nouma embassadour en Espagno, partiguè coume acò 'mé dos rosso que marchavon qu'à cop de fouit. E fouito que fouitaras, arribèron à Dijoun, e passavon davans l'archevescat dins aquel equipage juste au moumen que l'archevesque mountavo en carrosso.

Lou prelat, curious de saupre ounte anavo aquéu courrié tant póussous e d'aprene li nouvello que pourtavo, se meteguè à crida:

« Bst! Hòu! l'ami! arrèsto un pau! » Lou du fuguè proun un pau sousprés de s'entèndre souna d'aquéu biais, mai coume demandavo pas miés de rire un moumen de la curiousita de l'ome de glèiso, arrestè court.

Alor l'archevesque: « E d'ounte vènes, ié diguè, e de-que i'a de nòu? » Lou du, sènso s'embarrassa de coumplimen, respoundeguè: « l'a de pese verd, Mounsegne. » Lou prelat restè un moumen nè de la responso, pièi demandè mai:

- « E de-que disien à Paris, moun ami, quand siés parti?]
- Disien vèspro, Mounsegne.
- Mai coume t'apellon, tu qu'as l'èr de pas avé leissa ta lengo au couissin?
- Lis un m'apellon Bst! lis autre: Hòu! l'ami! mai iéu, que me counèisse miés, m'apelle lou du de Canto-Perdris. Hòu! poustichoun, fai tira.

E partiguè coume un lamp davans l'archevesque autant counfus de sa demando que countent de la responso esperitado.

LOU CASCARELET.

#### LA MORT DE MARIUS GIRARD

Quand li calour d'avoust escavarton li plueio, Que lis aubre di gres pèr avé toumba fueio Auson plus balança si tristi cabassòu; Enterin de-vers Bagatello \* Un plagnoun s'esperdié dins li vàsti pradello : La vièio Glanum èro en dòu.

<sup>\*</sup> Castèu dins lou Gres de Sant-Roumié. Es tout proche que mourigué Girard, lou 11 d'avoust darrié.

Ansin, un pau avans la fin d'uno journado, Quouro sus mount Gaussié li càudis alenado Rimavon en passant si roucas de peirard, D'aquelo ouro, un son de campano Esfraious anounciavo à travès vau e plano La mort de Marius Girard.

Éu, escoulan fidèu dou mèstre Roumaniho, Abéura de bono ouro à la font d'armounio, Pèr faire resclanti lou-noum de Sant-Roumié, La resplendour de sis Antico, Bèn lèu nous la cantè coume dins un cantico En grand artisto, e lou proumié.

Quau miés qu'éu a descri la vau de Vilassolo, Val-Amplo, lou Lauroun, Calanquet, la Pistolo? Car despièi Roumani enjusqu'à Sant-Grabié, A soun grand sourgênt de legèndo, Desboundant coulour d'or, nous es uno bevèndo Que se l'amourran pèr despié.

E pèr bouta la man i gràndis acampado, Sènso plagne soun tèms, enca mens si cambado, Bèn tant li Catalan de lausenjo embouni, Mescla dins nosto Reneissènço, De soun afougamen e de soun avenènço, N'an garda lou dous souveni.

En vilo d'Avignoun, i fèsto de Petrarco, Mounte l'aguè proun peno à mestreja la barco, Lèu la man au timoun, dre sus lou carcagnòu, — Pèr la patrio e pèr la raço — Atentiéu, à soun crid franquissian lis aurasso, Countènt coume de roussignòu. Quant de fes, de la Crau s'entournant d'un pas ferme, Venènt de countempla li troupèu dins lis erme E li pastre e li chin i coulas de clavèu, . Pèr n'escouta li rimo richo Leissado à l'abandoun sus de caiau escricho, Erian toujour que pu nouvèu.

Emé soun èr bounias dins sa barbo fougouso,
Treveire sounjarèu di colo peiregouso,
Ounourable coumpan de nosti bouscatié,
Sout li pin clafi de presino
Ié parlavo d'avaus, d'argelas e d'éusino,
Coume s'èro esta dou mestié.

Aillas, aro as fini, felibre dis Aupiho,
De rapuga toun mèu coume fan lis abiho.
Se dou su dis espi laisses toun brusc mau plen,
Aperamount, en ribambello,
A ti pèd creissi an muguet e roso bello,
Dintre lis ort sant-estelen.

Paradou, 41 d'avoust 1966.

CHARLOUN RIÈU.

Lou presta gasto, lou douna perd.

# LOU MAU DE VENTRE

Tetin, dou Boulan, fasié souvent lou malaut per manca l'escolo. Se plagnié de mau de ventre, e sa maire lou gardavo à l'oustau. Lou paire coumprengue leu la coumèdi, e, un vespre, ié faguè:

« La proumiero fes que lou mau de ventre te prendra mai, te menarai en Arle, ounte i'a 'no masco que lou garis radicalamen.

- De-que vos mena aquel enfant en Arle pèr un mau de ventre! diguè la maire; acò ié passo coume ié ven.
- 0, faguè lou paire, mai, aquelo masco garis pas que lou mau de ventre, garis tambén lou feiniantige. »

Tetin coumprenguè que soun paire avié devina, e, coume lou couneissié, à parti d'aquéu jour n'aguè plus de mau de vèntre e manquè plus l'escolo.

LOU CASCARELET.

# PÈR LI NOÇO DE GRAS E GERMANO CASSE

Miés que Jan-Peiret de Mount-Brun Emé soun espaso requisto, Tu, vas, lou cisèu lèst, en quisto, D'obro grando, o tièr jouvent brun.

Éu, souto un rouge calabrun, Trevè la bèuta; tu, l'as visto, Gènto nòvio, auturouso artisto, Au rouge Miejour, franc d'oumbrun.

Ensèn caminas vers la glòri, Clavas li peno, fasès flòri, Durbès lis urous endeman;

E d'abord qu'avès, flame couble, De vòsti paire un lausié double, Mesclas dins si brout, vòsti man.

A, MOUZIN.

La fèbre vèn au galop e s'entourno au pas.

### MICHEU POTAGE

Cinq coulègo d'Aubagno èron entaula au cafè de la Terraio, quand Jan Tourtin faguè :

« Michèu, tu que siés ana à Paris pèr l'Espousicioun, digo-nous

un pau ço qu'as vist e que t'a pica dins l'iue?

— Ai vist forço poulidi causo, mai, imagino-te dès Marsiho à coustat l'un de l'autre, e auras un Paris, sènso mar, sènso soulèu e sènso Canebiero. Dison que l'esperit ié cour pèr carriero, acò despènd de ço qu'apellon esperit. Lou matin, quand arribère, t'aviéu un ruscle! Diguère au couchié de me mena à-n-un restaurant; me desbarquè davans un cafè-restaurant ounte tout lusissié coume d'or, e li garçoun avien l'àbi à la franceso.

Ère un pau nè davans éli, coume dèves lou coumprendre; pamens, me diguère, fau faire coume lis autre. Touti en s'assetant disien: Garçon, cachemire! Que diàussi sara eiçò? pensère, e, cridère: Garçon, cachemire! Un grand lascar em'uno espèci de torco-man venguè freta la taulo, e s'enanè. Alor repetère: Garçon, cachemire! cresènt qu'èro un fricot; pan! venguèron mai freta la taulo. Aqui coumprenguère qu'à Paris dison cachemire à ço qu'eici apelan panouchoun o torco-man.

Boudiéu! se ma meirino, qu'èro uno damo à la grando, e que lou dimenche à la grand messo avié tant de cop-d'iue envejous quand metié soun chale de cachemire que, l'ai toujour entendu dire, avié cousta de cènt e de milo, boudiéu! se ma meirino vivié 'ncaro, e sachèsse qu'à Paris apellon cachemire un vièi torco-man, un sale panouchoun!... Es coume acò que l'esperit cour pèr carrriero à Paris.....

D'aquéu tèms, me pensave ço que poudriéu bèn demanda pèr manja. Pèr pas avé l'èr d'un Martegau, prenguère la carto e veguère *Potage*. Que poudié bèn èstre acò ? E quand lou garçoun diguè :

« Que faut-il servir à Monsieur?

- Potage, respoundeguère. »

Alor me veguère adurre uno bono sietado de soupo, pas trop espesso: es ansin que l'ame. Acò me racoumoudè un pau emé li Parisen. Tè! me diguère, fan coume à l'oustau, servon la soupo avans lou fricot. Quand l'aguère acabado:

« Potage! ié diguère mai, me languissènt de tasta aquéu fricot. » Em'acò m'aduguèron mai uno sietado de soupo. Coume èro bono, la mangère: mai disiéu dintre iéu, quéti coudoun! manja dous cop de soupo, soun nèsci aquéli Parisen! aurai quàsi plus fam quand tout-aro m'adurran lou fricot. E, despacienta cridère au garçoun:

« Potage, et vite! »

Lou garçoun sourriguè, e m'anè querre... uno tresenco sietado de soupo...

Coumencère à coumprendre qu'apelavon la soupo potage e, moun ome, pulèu que de passa pèr un que toumbo di nivo, avalère ma tresenco sietado, paguère e garcère lou camp.

Desempièi, en Aubagno apellon plus lou Michèu que Michèu Potage.

E. PLAUCHUT.

ı

# LOU NOUVÈ DOU TROUBAIRE

A Dono Mario Augier.

Souto li téule, aperamount, Dins la litocho ounte gelavo, Un brave troubaire aliscavo Li vers galoi d'uno cansoun, Quand l'anjounèu que s'entournavo Piquè de l'alo au fenestroun.

Hòu! rimaire! Pantaiaire! Veses rèn, entèndes rèn, Lèu-lèu! courre à Betelèn! Cour e lampe tant qu'a d'aleno, Aganto li vièi, li malaut Qu'avien ni', cambo, ni chivau, E vèi qu'an tóuti li man pleno: Vin, mèu, froumage, agnèu, fan gau Si bèu presènt de touto meno.

He! lunaire, Pantaiaire! Pourtèn tóuti quaucarèn A l'enfant de Betelèn!

L'artisto se n'en fai, de lagno!... Couquinas de sort, que voudrié Douna quicon qu'agradarié! Mai pas lou mendre sòu d'espragno! A peno se viéu dóu mestié, Quouro d'asard a pas la cagno...

Lou troubaire, Pantaiaire, Es lou soulet qu'adus rèn A l'enfant de Betelèn.

Es arriba ; que troupelado! Gaspard, Bautezar e Melquior, Pèr la mierro, l'encèns e l'or, Menon tres lòngui camelado. Queto joio! quete estrambord Dins touto aquelo defilado!

Lou rimaire, Pantaiaire, Bado davans li presènt Di mage de Betelèn.

A la longo passo e se clino: « Maire de Diéu, grand sant Jóuse, Escusas, semblo fach esprés, Porte qu'un plat de bono mino. Se sabias coume n'ai regrèt! Siéu qu'uno pauro cardelino: Li cantaire Gagnon gaire, E vuei s'atrovo qu'ai rèn Pèr l'enfant de Betelèn!

L'ase crido: Eh! bèn, l'ome, canto, Amor que sabes que canta, • E lou biòu, qu'es plen de bounta, Ajusto: « S'acò pièi t'espanto, Faren la basso à ti coustat, Qu'avèn la voues bèn musicanto.

O troubaire, Gai coumpaire, Pèr l'enfant de Betelèn Canto, t'acoumpagnaren.

Cantas, a di la Santo Maire,
 Cantas tóuti tres, mis ami,
 Que lou pichot vòu pas dourmi,
 E qu'avèn ges de brès, pecaire!
 Agués pas crento, ajudas-mi! »
 Jóuselet prègo lou cantaire:

Q troubaire,
 Bèu rimaire,
 Canto que cantaras bèn
 La glòri de Betelèn! »

Lou troubaire, l'amo arderouso, Alor cantè tant e tant bèn, Que l'enfant Jèsu, sourrisènt, Dedins la grûpi miraclouso S'es endourmi bèn douçamen A coustat de sa maire urouso...

O troubaire! Pantaiaire! Jamai cantères tant bèn Qu'aquéu jour à Betelèn!

La Gourgueto 1906.

RAVOUS GINESTO .

#### LA BASTIDO

Louiset lou sartre avié pres, de mita 'mé soun coulègo Danis, lou massoun, un bihet de la loutarié de la Prèisso.

Un dissate, davans lou cafè, en tubant sa cigareto, charravon de ço que farien de sa fourtuno, se ié toumbavo lou gros lot.

« Oh! ve, faguè lou sartre, se gagnan, te coumandarai uno bas-

tido superbo, que semblara lou castéu de moussu Mistra.

— Uno bastido ? Bèn, mai, sabes, se la vos, la pos faire : iéu, lou jour que gagnaren, foute touti mis outis dins lou canau, e pas plan! »

LOU CASCARELET.

La routo di counsèu es longo, Aquelo de l'eisèmple es courto.

П

### LOU NOUVÈ DI TAMBOURINAIRE

A Dono J. Roumanille.

Pèr faire uno bello vengudo, L'ange acampè li Prouvençau Dins uno plano d'estendudo; Li vièi m'an di qu'èro la Crau. Que fourniguiero!

Que de bandiero! Que de pegoun, que de fanau! Que de carreto e de chivau! Plaça pèr vilage e pèr vilo Emé touti si tambourin (D'aquéli n'i'avié mai de milo), Se boutèron lèu en camin.

La fourniguiero S'alongo en tiero, Chasco encountrado vèn plan-plan Pèr defila davans l'Enfant.

L'Ermito, lou Baile di pastre, Lou Prudome di pescadou, Que sabon legi dins lis; astre Èron li tres grand menadou.

La grando Armade, Bèn alignado, Emé tóuti si regimen, Bravejavo mens belamen!

Pièi venien li tambourinaire, E tu-tu-tu! e pan-pan pan! Li valènt s'espargnavon gaire, Acò n'èro un bèu chamatan!

Rounflounejavon, Vous escaufavon, lé metien tant de cranarié Que degun restavo darrié!

Quand li flahutet de Prouvènço Arribèron, enribana, E que jouguèron en cadènço: Un Diéu vèn de naisse, Hosanna!

La foulo urouso Emai piouso, Esmougudo pèr lou bèu cant, S'èro prousternado subran. Jusqu'i camèu di tres Rèi Mage Qu'à geinoui davans l'Enfantoun, E, segur, pèr ié rèndre oumage, Semblavon dire uno ouresoun!

Oh! que belòri! Que niue de glòri! E que l'Enfant de Betelèn De lis ausi fuguè countènt!

Li conse cridèron : « L'aubado ! • (L'aubo pounchejavo i cresten) Siblèron : Lèvo-te, Nourado, E parten lèu pèr Betelèn.

Li voues quilavon O bassejavon, Mai tóuti cantavon ensèn Coume à la fèsto de sant Gènt.

Largant soun brout de ferigoulo, L'ase, qu'èro dou Leberoun, Bramè: « D'aut! d'aut! la farandoulo! Que s'entournen à la meisoun! »

Que sarabando! Touto la bando, Pople, Rèi Mage, Prouvençau Trescavon que n'en prenien caud.

Lou biòu, un camarguen de raço, Pousquè pas long-tèms resista; Levè tout-d'un-cop si patasso, E falié lou vèire sauta:

Que galejado Dins l'assemblado! Mai li biòu, que soun bon enfant, Se fan jamai de marrit sang. Sant Jóusè regardo Mario, Voudrié bèn farandouleja..... Aro qu'es paire de famiho E qu'a soun iéli, a pòu d'ausa.

« Auso, coumpaire, Meno la maire Emé l'Enfant-Diéu, soun pichoun : Saran au siéu en Avignoun. »

La Gourgueto, 1906.

RAVOUS GINÈSTO.

## TÈ! BOUFÈTI

Boufêti sourtié de la boutigo dou manescau, en brassejant, coume èro soun biais, quouro rescountre la goio de Nenin que, coume devoto, es forço curiouso.

La goio, en vesènt Boufèti que brassejavo belèu un pau mai que de coustumo, ié faguè:

- De-que t'arribo, Boufèti, que brassejes tant?
- M'arribo rèn à iéu, respoundeguè lou brassejaire, mai, i'a Béulaigo que s'es creba un iue! e que sara belèu borgne pèr lou restant de sa vido.
  - S'es creba un iue! mai, en que fasènt?
- En fasènt lou signe de la crous, pecaire! l'avié long-tèms que l'avié pas fa, i'es ana trop vite, e...
- Alor èro coume tu, gusas, que se falié que lou faguèsses, saupriés pas se fau acoumença pèr lou front o bèn pèr l'embourigo!

Tè! Boufèti.

LOU LASCARELET.

Res fai mai de mau, qu'aquéu que noun viéu segound si precète.

Ш

## LOU NOUVÈ DI GALERIAN

A 'N Alèssi Mouzin.

Anas adoura L'enfant de Mario, Lou divin Messio Que vous sauvara...

A bord di triremo roumano Que menavon li galerian Èro qu'un crid: « Li bèu gabian Que nous adus la tremountano, Nous parlon, escouten si cant:

> « Anas adoura L'enfant de Mario, Lou divin Messio Que vous sauvara. »

Èro lis ange que passavon En anounciant li tèms nouvèu; Sis alo blanco coume nèu Dins l'azur linde clarejavon Sus la mar e sus li veissèu:

« Anas adoura L'enfant de Mario, Lou divin Messio Que vous sauvara. »

Li pàuris esclau de galèro An di, lou cor tout esmougu : — « Mèstre, s'es un Diéu qu'a vougu Nous libera de la misèro Qu'aquéu Diéu siegue bèn-vengu! Anen adoura L'enfant de Mario, Lou divin Messio Que nous sauvara.

Ato! li bougre! Mai en viage,
Coume d'anguielo de roucas,
Resquiharias à cade pas!
Pièi nautre pagarian li gage
Dessus lou cepoun dóu bourras

S'anan adoura L'enfant de Mario, Lou divin Messio Que nous sauvara.

Cargas-nous de gròssi cadeno
E parten lèu pèr Betelèn!
Tant partiren, tant revendren.
Vous juran qu'aurés ges de peno:
Un Diéu coumando, óubeïren!

Anen adoura L'enfant de Mario, Lou divin Messio Que nous sauvara.»

Li come, que n'avien l'enveio, Menon lou long troupèu d'esclau Que tirasson tant bèn que mau La cadeno que lis espeio. Quand arribèron, queto gau!

« Venèn adoura L'enfant de Mario Lou divin Messio Que nous sauvara.» L'ase reguigno emai chauriho: « Santo Vierge! vaqui de gènt Qu'an la cadeno e soun countènt! Segur qu'es de bravo pauriho, Auran pas camina pèr rèn.

> Vènon adoura L'enfant de Mario, Lou divin Messio, Que li sauvara. »

Lou biòu reno e fai moussu mougno : a Passo encaro pèr li gardian, Mai reçaupre de galerian Sarié de marrido besougno, Meriton pas d'èstre crestian

Nimai d'adoura L'enfant de Mario, Lou divin Messio Que nous sauvara.

Intras, respond la Vierge-Maire,
Repenti merito perdoun;
Parle au noum d'aquéu bèu pichoun
Qu'es nascu pèr mouri, pecaire!
E rèime ansin li bon larroun:

Venès adoura L'enfant de Mario, Lcu divin Messio Que vous sauvara. »

La Gourgueto, 1906.

RAVOUS GINESTO.

La verita pòu espera, Elo es seguro d'arriba.

### PARAULO RETIRADO

Lou long Cancano, que touti couneissès, porto si proumié faiou verd à moussu Tiro-Lengo; lou mège que l'ivèr passa lou tirè d'un marrit pluvèsi.

Lou mège gramacio Cancano, lou fai asseta; bevon un cop e charron.

- « De-que i'a de nou ? vous que legisses li journau, fai Cancano; nous-autre, i bastido, saben jamai ren de ren.
- Pas grand causo, moun ami; aro que lis eleicioun an fini, li journau soun enfetant, sabon plus que metre. Ah! tè! sabes que i'a: lou rèi d'Espagno se marido lou 31 d'aqueste mes.
- Ah! que me disès aqui? Sabiéu que se maridavo bèn lèu, mai auriéu jamai cresegu que fuguèsse dins lou mes de Mai. Saup pas lou prouvèrbi, alor?

Quau se marido en Mai, Avans un an se marido mai.

Es pas pèr dire, mai lou crese, un pau destimbourla, aquéu rèi, car entre nautre fugue di, es gaire delicat, tron de disque!

- Coume gaire delicat?
- Eh! bèn, vole dire que... pèr prene quau pren!...
- Pèr prene quau pren, dises? Es pas uno bravo chato, aquelo princesso?
- Oh! dèu èstre quaucarèn de fres! rèn que soun noum lou dis de rèsto.
- Bèn! a pas un poulit noum! e la dison tant bello! Se vèi que siés gaire au courrènt.
- Coume! trouvas qu'es un poulit noum, acò, vous: la princesso de Pato-en-l'èr? Eh! bèn, sias pas dificile, vàutri li medecin!
  - De-que dises ansin! Pato-en-l'èr, as di?

- O, la princesso de Pato-en-l'èr. Au cafè lou legissien l'autre jour. l'ai bèn entendu, belèu!
- Moun paure ami, crese que te fas dur d'auriho; coumprenes toujour tout de travès, e pièi vaqui ço qu'arribo: siés en trin de leva de marrit brut sus la plus poulido e la plus bravo di chato dou mounde. Apren que soun noum es Ena, princesso de Battenberg, e que lou 31 de Mai s'apelara la rèino Vitòri.
- Ah! s'es ansin, ai tort, retire mi paraulo e vous demande escuso. E dirai i coulègo dóu cafè, qu'un autre cop, quand legiran lou journau, bouton miés si bericle e duerbon mai lis iue! »

LOU SÓUVAGE.

Privo-te d'un plesi se dèu cousta peno à-n-un autre.

### MI BERICLE

En coussejant un marrit cat, Un raubo-nis dins moun aubriho, Sabe pas mounte ai acrouca Mi bericle, un bèn de famiho. Èron de moun rèire àutri-fes, S'endevenien aro à ma visto. Ah! d'aquéli n'en fan plus ges, Mai fagon de causo requisto.

Sautèron, — verai que courriéu, — De moun nas subre quauco branco. Ai proun cerca, ié dise adiéu, Es rèn, mai aquéu rèn me tranco. Lusien, si vèire clar e lis, Dóu lus de ma Prouvènço siavo; Arregardave moun païs Coume moun grand l'arregardavo.

Quand li fueio au bos toumbaran Vau vous retrouba sènso courre, Bericle d'argènt de moun grand; Senoun, faudra-ti que vous ploure? Mai se pòu qu'à la fin, bèn tard, Un de moun oustau, fiéu o fiho, Sout sis iue, rescontre d'asard Voste miraioun que soumiho.

En jougant vous prendra d'abord; Pièi, se ié siéu plus, m'es de crèire Qu'en sourrisènt au paure mort, Fara ço qu'ai fa pèr moun rèire. Sarés rouvihous à l'entour, Vaqui qu'emé pieta vous freto, Vous remostro Rose e Ventour; E iéu passe amount dins l'aureto.

l'ensignarés ço que mis iue An treva 'mé joio e bèn-èstre : Fiò dis aubo, estello di niue, E, subre-tout, libre di mèstre. Vaqui que soun cor s'espandis, S'enauro i bèlli souvenènço... Sara belèu moun paradis De revèire ansin la Prouvènço.

ALÉSSIS MOUZIN.

### UN PAU DE CHIFRO

- Dison que mor un ome chasco secoundo. (Ome o femo es tout un).
- Dison que sus dès milo persouno n'i'a qu'uno que vèngue à cènt an.

(Diéu nous counserve la visto enjusqu'aqui!)

- Dison que lis ome marida vivon dès an de mai que li celibatàri.

(Acò se coumpren: manjon mies à sis ouro!)

— Dison qu'un ome de grando taio a mai de chanço de veni vièi qu'un ome pichot.

(L'on apren toujour quaucarèn! farai metre de taloun à mi

soulié).

— Dison que sus milo persouno seissanto se maridon e la mita mai au mes de jun qu'au mes de desèmbre.

(Siéu pas d'aquel avis à mens de prendre un tros de glas pèr femo).

— Dison que la neissènço a liò bèn plus souvent la niue que lou jour.

(Acò dèu èstre se lou comte es juste).

- Dison que de touti li mestié es li medecin que moron li plus jouine.

(Acò provo que li vesito emai li poutringo ié coston gaire e que se li plagnon pas.)

UN QUE SAUP...
(Quau saup?)

#### LOU DOUMTAIRE

Viéu e feroun, banu coume un cifèr, en Arle, A fa beisa l'areno en mai que d'un, antan. Li courrèire l'avien bateja « Maufatan ». Acò 'ro un famous biòu! vous dis quau que n'en parle.

Aro, lou péu rougnous, lou mourre embavousi, Li bano vermenouso e la mèusso abenado, Porto l'esquèrlo au còu e coundus la manado. Segur, pèr tau pres-fa, poudien pas miés chausi: Saup tóuti li camin que davalon au Rose O que van vers la mar; saup mounte fau que crose Pèr s'acourchi; la niue, dóu lum de Faraman

Saup se faire un guidoun; e quand en Arle es fêsto, Eque ié fau gandi sièis tau, doumtaire en tèsto, Vai dre, lis iue barra, vèrs lou Cièri rouman.

MARIUS JOUVEAU.

## LI DOUS VOTE

Lou marqués de Maladona a soun castèv dou constat d'aut de Carpentras; e li cantounié, — n'èi pas pèr dire —, amon l'obro facho,

e, de cop que i'a, li camin, rèston fangous.

Aqueste mes de mai, i darriéris eleicioun, lou marqués, emai siegue vièi e proun escranca, vouguè faire soun devé e veni à Carpentras vouta pèr lou candidat reialisto, que, pecaire! avié besoun de rampela touti si voues.

Faguè dounc atala. Mai aguèron pas fa cènt mètre de to-rou-toutou dins de roudan d'un pan de founs, que sis esquino lou lance-

jèron e qu'uno idèio ié venguè:

« Blàsi faguè à soun couchié, siés eleitour, parai?

— Rènde gràci à Diéu, moussu lou Marqués, jamai res m'a tirassa davans li tribunau. Siéu eleitour.

- E, se siéu pas trop curious, pèr quau vas vouta?...

- Emé tout lou respèt que vous dève, moussu lou Marqués, vau

vouta per lou republican, coume de juste.

— Acò s'atrovo bèn, faguè lou marqués, viro brido, vai, moun ami, e siguen pas tant foutrau! léu anave vouta pèr lou reialisto, tu pèr lou republican, èro aqui uno bello journado de perdudo. Rintren au castèu, béuren un cop, sènso coumta qu'aquéli roudan fan tira, e que ti chivau s'espargnaran uno bello susado. »

Em'acò, en pas emé sa counsciènci, d'abord que li dous vote devien se faire contro-pes, moussu de Maladona rintrè prene lou fres

au castèu... e leissè courre l'aigo.

LOU CASCABELET.

### DISCOURS DE SANTO ESTELLO

#### PROUNOUNCIA A CETO LOU 3 DE JUN 1906

llustre Mèstre, gènti Dono, leiau Felibre,

Davans la mar encantarello que nous enchusclo e nous atrivo, vole auboura la Coupo Santo, simbèu dis esperanço e dis enavans felibren.

D'amount, dou soum d'aquelo mountagno de Sant-Clar que bagno si pendènt dins la mar de safir e dins l'estang d'esmeraudo, lou gachaire ideau qu'es à l'espèro despièi li siècle a certo vist passa sus terro emai sus mar li courtege e li floto e li triounfle e li desbrando, e tout lou chamatan galoi o terrible de nosto istòri patrialo, mai, se jamai soun cor a barbela, se jamai sa bouco a crida d'emoucioun e d'alegresso, es bèn lou jour que nòsti fraire Catalan aduguèron dins Avignoun, coume, autre-tèms, lou Comte Berenguié i'aduguè si galèro, lou magnanime recounfort d'aquesto Coupo escrincelado, Palladium trelusent de la patrio que renais.

Dins soun cant inmourtau de la Coupo, lou Mèstre de Maiano nous a revela tout lou simboulisme ideïous d'aquéu Sant-Grasau de mistèri ounte boui l'Aveni de nosto raço. E tambén, chasco annado, dins nosto fêsto voutivo de santo Estello, la Coupo es aubourado e, religiousamen, passo de man en man, testimòni de freiresso

e d'amour.

E vuei, dins aqueste moumen soulenne ounte s'afourtis libramen noste Counfederacioun felibrenco, es l'un di coustat li mai esmouvent bessai dou simboulisme de la Coupo que deu pivela nesti regard, soulicita nosto meditacioun.

De tradicioun inmemonrialo se dis en tout païs que lis ome bevent à la memo coupo de l'un à l'autre entre-counèisson si pensado.

Aquelo cresènço, vièio coume lou Mounde, se rescontro à l'ourigino de touti li rituau religious e de touti li legèndo poupulari. Noun vole pas rapela lou role de la coupo dins lis agapo crestiano que soun, li proumié tèms, de veritabli counjuracioun secrèto quand lis aposto e li nouveu bateja afiermon soubeiranamen sa fe en faci di suplice que li guèiron. Noun vole pas, nimai, faire d'alòngui sus la plaço que tèn la coupo dins li tradicioun de l'Umanita... Se Tristan e Isènt s'embriagon d'amour en bevènt à la memo coupo, sabèn peréu que lis eros legendàri mesclon soun sang dins uno coupo e it bevon à-de-rèng en signe d'alianço. Enfin, quau noun se recordo lou pretoucant testimòni dóu vièi rèi de Tulo que gardo jusqu'à sa mort, piousamen fidèu, la coupo ounte a begu mé soun amigo morto, pièi, la pourtant à sa bouco uno darriero fes, la bandis, en mourènt, dins la mar ufanouso...

De tout aquéu Legendié proufano o sacra aparèis claramen que l'ate de béure à la memo coupo coustituïs un juramen soulenne de

leiauta, de freiresso, d'afihacioun.

Es pèr acò qu'à touto epoco de l'Istòri, tóuti lis ome que s'assòcion e s'afreiron de-vers li mémi recoubranço an la coustumo tradiciounalo de s'acampa dins un counvit e de ié béure à-de-rèng à la coupo freiralo. Béure à la coupo dou Counvit, acò 's pèr éli faire lou sarramen à cor dubert, d'oubra, de se vouda, de se sacrifica, se

n'es de besoun, pèr lou triounfle de la Causo coumuno.

Dintre li siècle de mesclun pouliti, quand li Poudé publi descasènt devènon mai-que-mai incapable d'assegura la pas e la justiço, vesèn, di founsour di raço, s'auboura d'assouciacioun, quouro en plen jour, quouro en secrèt, qu'an pèr pres-fa d'assegura si membre contro li desaventuro e lis injustiço, e de ié pourgi la bono ajudo reciproco. Aquélis assouciacioun, aquéli Guildo conme lis apelavon, crèisson e se fourtificon au poun d'escalustra li rèi e lis emperaire que lis enebisson de-bado. Istituï lo pèr d'interès mutuan, éli prenon, à la longo dón tèms, un affat mourau grandissènt e diregisson pertés l'evoulnemen soncialo.

Es a soun eisèmple e sus sonn mondèle que se formon au siècle dong n'il prouméti Coumjuracioun municipale, aquéli Coumuno juindo, aquélis A vistanço, aquéli Coumfrarié que, ponderousamen, counce en flume que roump mateliero e levado, van counquista li

liberta communalo e li franqueso terradourenco.

Noste Mujour, precisamen, fuguê la terro d'eleigionn d'aquéli Countr de patrialo que dins l'inchaiènço e lou desordre di tèms, devent teren, per some iniciativo amirablo, sa fe, sa tenesour, soun espect despargue e d'ordre, de verta dié Cors de Travai publi, tracciót de rolle pitant de pont que nous espanton encaro vuei, bastussent d'ensteu de cauta, d'espitan, d'oubradon, se rendènt talamen mestresso de tord aflat sonciau dins soun terraire que li prince se veson fourça de s'acourda em'éli, de l'autreja li dre poulitique, pèr la forço memo di causo, éli an deja pres d'esperéli la coustumo d'eiserci...

E, se regardan de proche l'ourganisacioun d'aquéli groupamen, despièi la Guildo germanico enjusqu'i Counfrarié miejournalo dóu Sant-Esperit, vesèn que tóuti s'acampon freirenalamen dins un Counvit e que cade Counvive, cade Counfraire, cade Counjura béu à la coupo simboulico pèr marca soun iniciacioun, soun afreiramen, soun afihacioun.

Se dounc, au courrent di siècle, la ceremounié de la coupo se presento inmemourialamen coume un ate soulenne de counjuracioun, es-ti pas naturau e lèime que la Counjuracioun pèr eicelènci, que la Counjuracioun ideiouso entre tóuti, aquelo qu'enfado e pivello li valent per la mai noblo di causo e vers li recoubranço li mai esmouvento, es-ti pas naturau que lou Felibrige, fasent di tradicioun lou racinun de tout prougrès, poussedigue éu peréu la siéu coupo sacrado e l'auboure soulennamen dins lou Counvit santestelen?...

Ah! Counjura, lou sian de naturo, o Felibre! sian li Counjura de l'ideau, de la pouësio e de l'esperanço patrialo... Quouro, au sourti de la niue messourguiero, encaro tout emperesi de la som seculàri de nosto raço, nòstis iue parpelejèron de-vers l'aubo font-segugnenco, pode dire, e degun eici me fara menti, qu'un ome nouvèu dins tout noste èime se prouvè: avèn crida de joio e de coulèro, avèn canta d'amour e d'ahiranço, e, dins lou founs de nòstis amo, avèn fa lou sarramen soulenne de la Counjuracioun felibrenco...

Es aquéu sarramen, o Felibre, que nous rènd libre e que nous rènd majour. Es éu que descadeno en noste piés tout l'enavans grave e jouious di raço que renaisson. E, certo, noun es pas pèr de menudaio de vanita que lis ome de counsciènci pronóuncion un tau juramen. Tambèn, quouro venèn lou sagela en bevènt à la Coupo Santo, es alor que coumprenèn touto la pourtado de noste vot, touti

lis oubligacioun de noste engajamen leiau e libre.

Sian tout d'ami, sian tout de fraire! Vaqui la deviso essencialo dóu Felibrige, e tambèn la deviso fourçado de touto Guildo, de touto assouciacioun. Mai noun es pas dóu bout di labro qu'uno talo deviso se dèu crida! Elo es pèr abita vivènto dins nosto amo; elo a de s'afierma coume règlo countùnio de nosto vido; devèn agi de-longo en fraire, en ami; e la proumiero coundicioun de l'amistanço e de la freiresso es la leiauta franco e puro, es la fide-lita jouiouso à la libro coustitucioun de la famiho felibrenco.

Noste regreta Capoulié En Fèlis Gras s'escridavo un jour dins un counvit : « Maudi siegue aquéu que chaupino sa coustitucioun e es-

trasso sa l'éi! que l'iro dis ome l'ajougne e n'en deliéure lou mounde!...» E nautre que, senso avé lou fetichisme de la lèi, barbelan davans lou mistèri de la Coupo, vuei cridaren de nosto part: « Ome que nourrissès de pensado ahirouso; cor lóugié, trufaire e doutaire; amo caravihouso incapablo de fe; tantalòri afrancihouti que vesès dins li rite dóu Felibrige noun sai quete soulas de recreacioun e de vanita; marchand dóu Tèmple que batès mounedo emé li sant relicle; bóumianaio que senso vergougno fasès tripet dins lou Castèu d'Eiglun... touqués pas, touqués jamai à la Coupo Santo! En la pourtant à vosto bouco coumetrias uno d'aquéli proufanacioun óudiouso que fan veni lou regoulige e s'ameriton lou mesprés dis ome!...»

E nàntri, o Felibre leiau, mai-que-mai counsciènt dou pres-fa souciau que nous escai e que se coungreio amirable en lou simbou-lisme de la Coupo, groupen-nous sèmpre que mai afeciouna souto aquén palladium de la Patrio... Aquesto annado marcara uno dato dins l'Istòri dou Felibrige, car vuei s'acampon eici pèr la proumiero fes li representant naturau e lèime de nòsti Guildo reriéudado, li mandadou di nouvelli Counfrarié de la Patrio qu'an fa dins soun cor lou sarramen de Font Segugno e que vènon en lou Counvit tradiciounau, sagela soulennamen, à cor tout dubert, lou Pache

de l'atiliacionn felibrenco.

Veici la Coupo, o Mandadou! à-de-rèng bevès-ié au noum d'aquéli que vous mandon... Salut à vous, Gastou-Fèbus, que sian urous de courouna vosto infatigablo e fegoundo proupagando; à vous, Felibrenca de Sent-Cla, que sias vuei nosto abelano e couralo ous-. tesso e qu'espandisses dins vosto publicacioun annalo touto la flouresour pintouresco de voste vigourous dialèite; salut à vous, Bournat dou Peicigord, qu'en de festo superbo e digno establisses lou bon renoum dou Felibrige e jé counquistas à cha pau touti lis aflat souciau don terraire; à vous, Flourege Pronvencau, qu'avès bandi i quatre vent li leicoun majouro de l'Evangeli Mistralen; à vous, Escolo Mistralenco, que fasès flouteja fieramen lou Lioun d'Arle subre lon Rose tourmentan; à vous, A. E. T. N., fougau de jouvenço e d'educacioni prouvençalo; à vous, ...? Prouvenço!..., que, dignamen, per iniciativo e bon voulé counquistas Marsiho; à vous, Escolo de la Santo-Baumo, ajassado felibrencamen i pèd de la séuvo sacrado; salut à vous, Enfant de Prouvênco, qu'en terro niçardo, sus li raro de la patrio, mantenès belamen la prouvençalita don Cap de Pronvenco; à vons. Toulousan de Toulouso,

gagnas lou terraire moundin en n'estudiant piousamen lou passat glourious; à vous, Nucioun Gardiano, que nous adusès lou libre enavans di relarg camarguen; salut à vous, enfin, Escolo deras Pireneos, que, mai-que-mai afreirado à vosto einado la Gaston-Fèbus, destressounas li forço vivo de la Guscougno. Salut en touti, à-n-aquéli que soun vengu em'à-n-aquéli que vendran.

Salut à vautre, tambén, Felibre esparpaia que vous sias recampa vuei per nosto festo coulento. Aves coumprés que lou sarramen felibren noun es lèime e noun pou deveni fegound en foro de la

coumunioun freiralo de la Compo...

Lis ome passon, li farfantello s'esvanisson: la Coupo rèsto. La

Coupo Santo, vaqui lou raliamen suprème!...

Que touti aqueli qu'an lou cor pur e barbelant d'ideau, que touti li « franc caratère e lis ome revoi » astra pèr tira « noste païs dou sourne », que touti li Miejournau digne d'intra dins la counjuracioun di Recounquisto, que touti li verai Felibre enfin vengon soulennamen s'abéura vuei à la Coupo ideiouso que nous vèn di Catalan. E, qu'à plen bord, aquelo Coupo santo e versanto ié vuege, emé l'unioun e la pas sant-estelenco,

Lis estrambord E l'enavans di fort!

PÉIRE DEVOLUY.

## RODO QUE ROUDARAS, AU RODE TOURNARAS

Sus l'èr de la Farandoulo de Tarascoun.

Pos barrula dins l'estrange païs,
De la Roumagno
A l'Alemagno,
Pos barrula dins l'estrange païs,
Pèr ana veire co qu'as jamai vist :
Mai d'encountrado
Alegourado
Coume la terro ounte vives, pagés,
Auras ben courre

Per vau e mourre,
Ounte que vagues n'en trouvaras ges.

Pos t'avanqui liuen de ti Segounau;
Mai d'entre-signe
Plus grand e digne,
Pos t'avanqui liuen de ti Segounau,
N'en veiras ges foro dóu termenau:
Areno e Cièri,
Bàrri d'empèri,
Palais de papo e castelas de rèi,
Arc-de-triounfle,

Arc-de-triounfle,
Porto-aigo à rounfle,
En-liò veiras un plus riche aparèi!

Pos t'esmara vers la Grèço eilalin
Ounte lou Pinde
S'enauro linde,
Pos t'esmara vers la Grèço eilalin
Ounte lou cèu es toujour cristalin:
Mai si coustiero
Tant plasentiero
E si roucas coulour d'or e d'azur,
Dins lis Aupiho,
Bèu brusc d'abiho,

Li pos revèire en un cèu autant pur.

Pos te gandi vers li pople nouveu,
Dins li fabrico
De l'Americo,
Pos te gandi vers li pople nouveu
Que fan sa soupo à l'òli de naveu:
Mai di bajano,
Di merinjano
Qu'embausemavo l'òli d'óulivié,
Osco seguro,
Auras rancuro
E dou bon vin que toun paire bevié.

Pos aluca li damo de Paris,
Lis Italiano,
Li Castihano,
Pos aluca li damo de Paris
E la bèuta pertout ounte flouris:
Mai de pouleto
E de perleto,
Coume n'es Arle lou nis sènso egau,
Pèr la noublesso,
La gentilesso,
N'en veiras ges que fagon tant de gau!
En Arle, Juliet 1906.
F. MISTRAL.

## r,ign

Jóuselet, lou drole de Nas de Cabro dóu mas dis Aguto, es mingouloun e es resta un pechelet despiéi qu'aguè lou senespioun; sèmblo que béu de marrido aigo o que manjo de gipas. Vai sus si dès an e n'i'en dounarias pas vue. Tambèn sa maire los teniour aprèss, i a cerco si goust pèr la mangiho e lou mignoutejo de-longo. La toujour pèr éu quaucarèn en subre de l'ourd n'ari de l'oustau.

Aqueste an per meissoun l'avié per lou dina di meissounié uno soupo de tavo fresco, pièi li favo em'uno toumo. La femo de Nas de Cabro sabié que soun nistoun amavo gaire li favo e que quand l'avié rèn aurre per bajano, l'enfant besuquejavo senso se rempli lou ventre.

« Escouto, Jóuselet, moun bèu! diguè ansin à soun drole, te vau faire couire un iòu, te lou pourtarai dins la gatouio, l'anaras manja après ta soupo dóu tèms que lis autre manjaran si favo, pièi tournaras t'asseta mai à taulo. Es pas necite que te vegon manja l'iòu, li meissounié, semblarié qu'es pèr ié faire lingueto. »

Ansin fuguè. Jouselet s'esquihè à la gatouio dou tèms que li meissounié esconfiavon li favo, pièi quand aguè fini l'iou:

« Mama, cridè à sa maire, pode sourti, aro qu'ai acaba l'iòu ? » Aquesto faguè semblant de rèn entèndre, mai venguè roujo coume un grato-quiéu.

« Mama, cridè mai lou pichot, digo-me se pode sourti, l'ai acaba l'iòu : agues pas pòu que fague lingueto i meissounié aro! »

LOU CASCARELET.

Li dous mot li plus court à dire o e noun soun aquéli que demandon lou mai d'atencioun.

# LOU SOFÈ

Oh! lou *sofr* de nôsti-rèire! Capèu coume se n'en fai plus! Me sèmblo encaro de lou vèire Dins un trelus.

Vaste triounfle de la fêsto, Conifavo, vièi o flame-nòu, Lis espalo autant que la tèsto Dins soun envòu.

Ei pas poulit tout co qu'agrado : Ero long coume un jour sèns pan, Meme quand l'avias en pensado Rougna d'un pan.

Avié de péu coume uno malo Vo coume un pitre qu'a de péu, E quétis alo, quétis alo, Aquéu capèu!

<sup>\*</sup> Estroupiaduro dou francés chauffé, coume se dis pouclo, per capeu.

Quand lou nivo crebo o s'estrasso, Emé pleno segureta, Poudias souto aquélis alasso Vous assousta.

De fourtuno pichoto o grosso, Li jouinas de nòsti cantoun Se lou croumpavon pèr si noço A Gayajoun.

Dins la bastido, uno mesado Avans lou repas cantarèu, Lou *sofè* fasié soun intrado Emé l'anèu.

Coume un santoun souto uno vouto, Jusqu'au bèu jour di gai pan-pan, Èro estrema, lou pauret! souto Quàuqui riban,

Dins uno bouito negro, enormo, Espetaclouso d'aut en bas, Cartounado segound sa formo De capelas.

Mai quand sourtié, zóu! la ninèio; « Lou sofe! » trasien de crid fou, En courrènt après li dragèio Dins li drajou.

A la darriero vióulounado, Zóu mai lou sofe dins lou trau! E pèr éu jamai d'envoulado Dins lou mistrau!

De sa bouitasso entenebrado Lou sourtien plus, li bràvi gènt, Que pèr festa sa benurado Noco d'argènt, Pèr mena jusqu'au cementèri Quauque richas dou vilajoun, Pèr adurre au sant batistèri Un enfantoun,

quand, au tèms dis agrioto,
 Au brut clar di got dins lou mas,
 Maridavon vo la pichoto
 Vo lou jouinas.

Mai ié sourtien tambèn, pecaire! Quand souto li ciprès afrous A soun tour anavon se jaire, Li bras en crous.

Que n'ai vist, de mort, au vilage, Bèn abiha, quàsi coussu, Lou sofè de soun maridage Subre lou su!

Ères aqui, capèu de noço, l clarta dóu mes printanié, Tout lusissènt d'un cop de brosso, Las! lou d'arrié!

E fasiés longo la civiero Davans l'oustau, souto lou cèu, Dins lou ramage di preguiero E dis aucèu.

Grandissiés enca de tout caire, Coume l'aubo e coume lou vènt... Ére enfant, deja pantaiaire, E bèn souvent

Me venié foulamen l'idèio Que, coume un vòu de parpaioun, Arrapariés dins l'empirèio Lis angeloun.

Embrun, lou 8 d'Avoust 1906.

CLOUVIS HUGUES.

#### LOU SINGE DE MOUSSU BOUDIN

Aviéu douge an, pas mai, quand moun paire me diguè:

- « An! veguen, te fau aprene un mestié, que sian pas proun riche pèr te faire avoucat, ni pèr te leissa gourrineja de-long di bàrri. A toun age, gagnave moun pan, e te prègue de crèire qu'èro pas sènso peno, pèr-ço-que me falié vira la rodo d'un mèstre courdié qu'emplegavo mai de canebe dins uno journado que ço que ta pauro grand n'en fielavo dins un an. N'empacho qu'èro uno bono pasto d'ome, e bèn sabènt. Sabié faire la chifro e signavo de soun noum coume un grafié. léu que te parle, se n'aviéu sachu faire autant quand, plus tard, partiguère pèr l'Africo emé lou regimen di canounié, liogo de reveni, au bout de quatorge an (car fau te dire que ramplacère) emé li dos brisco de lano sus li mancho de ma tunico, sariéu revengu 'mé lis espaleto de capitàni, e n'auriéu pas besoun de te demanda, vuei, lou mestié que vos faire.... Qu'as decida, pichot?
  - Paire, vole faire lou mestié d'escultour.
- Eiçò vai bèn. Toun peirin, Porto, lou charroun, soun coutrio emé Boudin l'escultour e cambarado d'escolo. Deman te menara dins soun oustau, veiras soun ataié, lis obro que se ié fan, e, s'acò t'agrado, poudras coumença de tabassa sus lou mabre e de faire vèire quau siés. »

L'ataié de moussu Boudin èro dins la carriero de Sant-Miquèu, en Avignoun. Es aqui que, pendent uno longo pountanado, quand regardave pas la rousaço goutico de l'anciano glèiso di Celestin, arregardave voulountié li Prouvençalo que, quihado sus sis ase, se balançavon coume de rèino entre li dos ensàrri cargado de liéume e de frucho à n'en creba, emé, dins lou jougne, un brout de jaussemin pèr lou soulèu flouri.

Mai lou mèstre èro aqui, e, pèr tant brave que siguèsse, souventi-fes me disié: « An! de-que ravassejes? toun argelo se seco, e ta maqueto sara perdudo. « O bèn: » Sara pas tu que faras tremoula lou mabre, se toques jamai tis óutis. Anen! aganto ta masseto d'uno man, ta gradino de l'autro, e tabasso, tabasso, que n'en vegue sourti quaucarèn dou blouquin que tu tènes. Coume! i'a tres jour que siés aqui, sus lou meme moussèu, e ta fueio d'acanto es à peno aplanado. Siés pas fort, lou sabe, e ti bras soun feble, mai lou tout n'es qu'un entrinamen. E n'agues pas pòu dis ampoulo, niz de te pica sus li det: fau que lou mestié rintre..... Vese que m'as coumprés. Travaio. »

Travaière bèn tant que, l'an d'après, gaubejave lou mabre e l'argielo coume un fin oubrié. E sariéu seguramen devengu celèbre — aro, crese que lou devendrai jamai — sènso un evenimen que fai lou sujèt d'aquésti pajo e que fau que vous raconte de fiéu en courduro.

Lou fraire de moun patroun, Louis Boudin, èro cirourgian de marino, navegavo, coume tau, d'un countinent à-n-un autre, e, dins si relàmbi, fasié forço croumpo dins li païs estrange. Uno fes adusié de regime de banano, de massapan de dâti; uno autro, de papagau de touti li coulour. Adugue meme uno Chineso que, autant que pode me n'en souveni, èro poulido coume un iou (es verai de dire que la veguere emé mis iue de jouvent) e qu'avié d'iue, d'iue pivelaire, ben tant que n'en restavias ne. De-que n'en fague piei, lou sabe pas, mai crese fort que l'entourne dins sonn païs, per-ço-que, malautouno, noun poudié s'acoustuma à nosto maniero de vieure e de faire..... dirai meme de faire l'amour, car me sieu leissa dire que li femo d'eila n'eron pas coume li nostro sus aqueu raport. M'an meme afourti... mai, quand s'agis dou femelan, crese que lou meiour es encaro de rèn dire.

Uno vèio de Nouve, de retour dis Isclo, adugné p er soun fraire un

singe que n'avié pas soun parié. Foro la paraulo, ié mancavo rèn, rèn de rèn, e dirai meme que couneissiéu d'ome, coume n'en counèisse à l'ouro d'uei, qu'èron liuen de valé, coume inteligènci, lou singe de moussu Boudin. Èro de la taio d'un enfant de vuech an, emé lou péu couira, lou front bas e ridela e li parpello roso. Sis iue, redoun coume d'avelano, èron talamen furnaire e talamen couquin que senso ren vous dire — amor que noun poudié parla quand vous fissavon, devinavias subran ço que voulié o ço qu'anavo faire. Moun patroun lou vougue. Is fague faire dins l'escour un grand tibanèu bèn coundiciouna e bèn tant poulidet qu'aurias di, de liuen, lou păli d'un chèfe arabi. Es aqui que venié se repausa quand, las d'escala li gorgo e de brandouia li voulet de l'èstro, maucountent de sa cadeno, car, l'avien encadena, lou paure, ansindo qu'un presounié, e, desempièi, assajavo inutilamen de roumpre lis anèu de ferre que lou tenien à l'estaco. Uno fes, pamens, li roumpeguè, e, lest coume un singe, - es lou cas de lou dire - escalè la gorgo d'un bound, pièi, sus lou releisset de la téulisso, se campè bravamen, en jougant emé sa co e fasènt touto sorto de grimaço. E nautre, que lou regardavian en risent, fuguerian ben capot de reçaupre sus la tèsto touti lis estoupin que ié toumbavon souto la man e que, sarra coume la plueio, s'amoulounavon dins l'escour. Falié pas pensa d'ana courre eilamoundaut sus li téule pèr pousqué l'arrapa. A-n-aquéu jo li singe soun passa mèstre, e sauton d'uno téulisso à l'autro, e se pendoulon per la co mounte, mau-grat tout noste bon voulé, pourrian pas soulamen pausa li pèd. Lou leisserian aqui e penserian que lou miés èro de lou prene pèr lou groumandige. Adounc, aduguerian uno prouvendo de fru de touto meno, de nose subre-tout, e, sus lou soum de soun tibanèu, li meteguerian bèn en evidenci, de sorto que, à souleu fali, lou veguerian redescendre de mounte avié mounta, e plan-plan s'acaminè vers la mangiho. E mangè talamen que, lou moumen d'après, vincu pèr la fatigo e pèr la digestioun, s'anè jaire coume d'abitudo e s'endourmigue coume

un benurous. Es aqui que l'esperavian. Fuguè lèu mai feissela, meme que, pèr lou puni de soun escapado, l'acourchiguerian sa cadeno de dous bon pan au mens.

\* \*

Erian dins l'ataié de la carriero de Sant-Miquèu quatre aprendis. Avian touti quatre, coume lis enfant de noste age, un pau la testo à l'envès, e quand lou patroun èro deforo - quand li cat ié soun pas li furo danson — aboundavian mai dins li marrit tour que dins l'eicelènci de noste pres-fa. Quand gachavian de gip, n'en fasian de bouleto, e, zóu! sus la testo di santi-belli que nous avien douna pèr moudèle. A la Vènus de Milo, en quau manco li bras, avian adouba dous manche d'escoubo. Couifavian uno testo de mort d'un grand capelas de péu de lapin, e dins si dènt de vièi evòri metian uno pipo d'un sòu, o bèn, l'ivèr, dou tèms de la vihado, em' uno candelo atubado souto soun crane fasian sourti lou lum de sis grands iue trauca, e lis enfantet qu'alor venien, en vesènt aquel espetacle, s'encourrissien fou d'espavento. Lou malur es qu'un ome de counfisanço, lou paire Coumbo, qu'èro un ancian fraire de la Dóutrino crestiano e qu'avié, dins un moumen de foulige, jita sa raubo is ourtigo, lou malur es, dise, qu'aquéu manèfle, que sabié rèn mai faire qu'escouba l'ataié e rapourta ço que fasian au patroun, un jour, sènso nous preveni, faguè un tian de noste enfantoulige, e me carguè talamen, iéu mai que lis autre, que mèste Boudin m'alounguè un carpan que de ma vido e de mi jour n'en reçauprai jamai lou parié. lé veguère plus, lou sang me mountè dins la tèsto, e. d'un vanc, m'enbandiguère dins l'ataié en me jurant ben de jamai plus ié reveni.

L'endeman, moun peirin, Porto, qu'èro un brave ome, venguè s'esplica 'mé sonn ami Boudin, e, counfus, faguère mai moun intrado, mau-countent dou rire de mi coumpan que parlavon à la chut-chut e que se trufavon de iéu. Jurère de me venja, noun pas

dis aprendis, mai dou paire Coumbo. Aqueste, l'aguère dins l'iue. Lou paure ome avié uno deco, e noun di mendro. Èro un chuchomoust, e pire qu'un mousquihoun. A la cantounado, quand degun lou vesié, s'amourravo dins la croto i damo-jano dou patroun e revenié d'aqui emé de sessignoto à faire tremoula lou Mount Ventour. L'aviéu sousprés mànti-fes, mai jamai, au grand jamai, me sariéu permés de n'en dire un mot, au patroun subre-tout. Reivère d'autro causo e cerquère, cerquère bèn tant que finiguère pèr trouba.

. \* .

Un jour, moussu Boudin e sa famiho s'enanèron en Lengado pèr croumpa, crese, uno cargo de rasin. Alicant e clareto, acò fai de bon vin. Uno fes lou patroun parti, e bèn parti, anère, sènso èstre vist de res, destaca lou singe de l'escour, e l'aduguère, en lou caressant, dins la croto de moussu Boudin. Uno fes aqui-dedins, faguère mounta lou singe sus lou boulidou, au founs, dins la sournuro, mounte i'avié li barrau e li damo-jano de vin muscat. Eiçò fa, barrère la porto à la cadaulo soulamen, e m'envenguère dins l'ataié. Coumbo èro aqui que tubavo soun cachimbau e que, lou regard souto espinchavo s'erian bèn atentiéu à noste travai. A-n-aquéu moumen, pèr asard, touti li masseto tabassavon sus l'acié dis outis, e lou mabre resclantissié coume uno campano de brounze fin. Iéu, qu'aviéu moun idèio, teniéu lou vièi d'à ment, e, dins un vira-d'iue, lou veguère que despareissié. Sabiéu mounte anavo, e, sènso rèn dire en res, esperave lou moumen de pousqué rire un pau. Acò fai tant de ben! Esperère pas trop. Sus lou cop de vuech ouro, dou tèms que fasian la coulèto en galejant gaiamen, entendeguerian un grand crid, uno clamour d'esfrai, talamen doulènto que, sesi, mi cambarado se demanderon co que venié d'arriba — iéu, sabiéu en de-que me n'en teni - e se precepitèron coume de fou, dou coustat de la croto de mounte avié clanti lou rangoulun. Durbiguèron

lèu. O mi bràvis ami! quete espetacle! A coustat d'uno damo-jano vuejo e routo, lou paire Coumbo èro estira, emé, sus sis espalo, lou grand diablas de singe, lou tenènt pèr lou còu, que fasié peta si dènt dóu rire, — car, lou sabès, li singe rison quand vènon de faire quauque tour de soun mestié. Aubourèron l'ome plus mort que viéu e l'aduguèron dins l'ataié. L'espounguèron souto lou nas emé de vinaigre e ié faguèron lampa un bon vèire de licour de sauvi: Quand fuguè remés, tóuti ié demanderian ço que s'èro passa.

« Imaginas-vous, nous diguè, qu'ère dins la croto, en trin d'uia li bouto de moussu Boudin, que me l'avié bèn recoumanda avans de parti pèr Uzès. Se ié vesié rèn, o quàsi rèn, ma lanterno èro mau garnido, e n'aviéu pas vougu remounta pèr ié remetre d'òli. Tout à-n un cop, jour de Diéu! me sènte toumba dou boulidou sus lis espalo un grand diablas de cors, uno espèci d'escarinche que m'aganto pèr lou còu. Sousprés pèr l'espavento, fau ni uno ni dos, e toumbe à la revèsso en jitant un grand crid. Es alor que sias vengu, e crese que sènso vosto ajudo ère un ome perdu, perdu.....

- Coume la damo-jano de vin muscat, ié dise alor.
- La damo-jano de vin muscat! esclapado! es esclapado! ah! malur! de-que dira moussu Boudin?
  - Qu'aurié miés vaugu que la beguessias.
  - Te crese! » me faguè lou vièi.

A dous jour d'aqui, quaucun que m'avié vist mena lou singe dins la croto l'anè dire à moussu Boudin, e dou cop, mau-grat moun peirin Porto, fuguère enmanda de l'ataié.

F. FAVIER, felibre dou Moulinas.

Pulcu que de te leva emé un dèute, Coucho-te sènso soupa.

## AU TIATRE D'AURÉNJO

Après la pountannado d'aquésti darriéris annado, l'art e la pouësio miejournalo vènon de recounqueri lou tiatre d'Aurenjo, lou Cièri, dins la persouno dóu cancelié dóu Felibrige En Pau Marieton que, ajuda d'aro-en-la pèr noste ami Antony Real, ourganiso

li representacioun annalo.

Res miés que Pau Marieton, pèr soun goust esquist dins la chausido di pèço, e sa perseverènci que ni travai ni peno an jamai rebuta, res poudié miés vivifica e regenta aquelo magnifico restauracioun de l'ideau antique. Soun coulabouradou Antony Real, que pèr sa famiho a de quau teni, èro tout designa pèr representa

dignamen la vilo d'Aurenjo.

Li representacioun aquest an èron souto l'envoucacioun dou grand Corneille, à l'oucasioun de soun tresen centenàri. La Coumèdi Franceso, lou bèu e bèn-ama Mounet Sully en tèsto, a eicelentamen jouga Horace e Polyeucte. Mai lou grand interès dou triduum tragique d'aquest an es esta la representacioun de quatre obro inedito. Dos d'aquélis obro èron d'autour prouvençau. Emé Polyphème, lou cap-d'obro d'Albert Samain mort i'a pau de tèms dins sa 40° annado, e la Sapho dése pérée de Madamo Delarue-Mardrus, es esta grand lou sucès de la tragèdi dou pouèto de-z-Ais, Lionel des Rieux, Hécube, e tambèn aquéu dou dramo antique de noste pouèto marsihés Elzéar Rougier, Les Funérailles d'Homère.

Aro dounc, un tiatre d'acioun lirico eisisto e prouspèro dins nosto lumenouso Prouvènço, gràci au felibre que presido à sa destinado; e revesen aqui uno reneissenço veritablo de l'estetico dou

dramo grèco-latin.

R. G.

# TÈ TU, TÈ IẾU

Tarascoun pèr li garçoun, Arle pèr li fiho, Carpentras a li berlingot, Nimes li fablo de Bigot... Mai lou saboun dóu *Mikadò* sort de Marsiho.

## LA CARRELLO

Quand anave à l'escolo de moussu Pons (boudiéu quant i'a d'an!) aviéu pèr cambarado lou brave Pauloun, la pasto di drole, un pau simplas, se voulès, coume lou provo ço que i'arribè 'mé sa maire.

Sa maire èro bravo, segur, emai bono belèu, mai d'un sang de

tron-de-disque, e coulèro à se disputa 'mé lou bon Diéu.

Un dijou nous erian di emé Pauloun de parti tre qu'aurian dina pèr ana cerca d'aspergo sauvajo au camin dou Reiau. Pas pulèu leva de taulo courre vers moun ami que m'esperavo; prenèn chascun un coutèu em'un pichot saquet e partèn.

De-long dou camin nous amuserian coume de badau, nous courrian après, nous gatihavian pèr nous faire rire, fasian la resquiheto long di ribo, quand, tout à-n-un cop, nous aviserian que lou soulèu trecoulavo, e d'aspergo, n'avian pancaro vist pouncheja uno.

Pauloun risié plus :

« Siéu perdu, s'aniue rintre sènso aspergo, aurai ma rousto, acò 's segur, diguè. »

Après forço viro-tourno, n'en trouverian pamens quàuquis-uno arrascassido e seco coume de brouqueto, li rabaierian e lou soulêu estènt toumba despièi proun tèms, penserian de nous entourna.

Arriba à l'oustau de Pauloun, i'avié que soun paire que, bravas, trouvè lis aspergo bello e bono : iéu i'aviéu leissa ma part, avian mes bèn en visto, au dessus déu paquetoun, li plus poulido, escoundent au mitan li passidouno coume es l'abitudo de faire. Mai tout à-n-un cop la maire arribo déu lavadou. Avié 'spera enjusqu'à la niue que Pauloun ié menèsse la barrioto pèr adurre lou linge, coume parèis que n'èron counvengu, e l'aguènt pas vist veni, s'entournavo emé la canestello sur la tèsto e dous gros fais sout li bras...

Ah! paure! n'i'aguè de : Tarnagas, de gu, de moustre, de rascas, de bon à rèn... sènso coumta que li bacèu èron pas liuen.

Lou brave Pauloun beissavo la tèsto, disié rèn, mai plan-plan, de requieloun s'avançavo dou placard. Lou durbiguè sèns brut, prenguè l'ouliero e s'aprounchè 'mé prudènci de sa maire.

« Mai dequé vai mai faire aqui aquéu marrias! moun òli! Zóu, fai-te de bougneto, aro, i'a pas proun de trapalas à ti braio! »

Pauloun en tremoulant ié faguè:

« Maire, escoutas-me. Moun paire disié l'autre jour qu'erias uno vièio carrello e qu'aurias besoun d'èstre vouncho emé de bon òli. Alor ai pensa que se voulias... vaqui l'ouliero, acò vous fara de bèn. »

La maire se teisè subran, leissè 'sta Pauloun; mai se virè devers soun ome li poung en l'èr, emé d'iue que me faguèron pòu... e m'esbignère.

VICTOR SYLVESTRE.

# SOULOMI ROUGE

(Sus l'èr Indian de La Danso di Trèvo)

I chèfe Co-de-Fèrri e Ourse-Soulitàri.

Moun fraire Rouge
Canto, ferouge:
Es un cant de mort.
Moun fraire indoumtable a lou pitre fort.
Rouge es moun cor!
Ai! rouge es moun cor!

Avié, moun fraire, Un emperaire Grand e renouma Au draiòu guerrié pèr l'acamina : Mountesuma !

Ai! Mountesuma!

Avié de vilo Superbo à milo, De tèmple, flouri De tóuti li gèmo e d'or pur, óufri Au grand Esprit, Ai! au grand Esprit!

Avié, sóuvage,
Pèr si carnage,
Li plano e li mount
D'un mounde, e, sarra coume uno meissoun,
Quant de bisoun!

Ai! quant de bisoun!

E libre e sàvi
Tau que sis àvi
Felen dóu Soulèu
Fumavo, ourgueious, au fiò dóu Counsèu,
Soun calumèu,
Ai! soun calumèu!

Mai Fome Pale, Que fai soun chale De tout embruti, Un jour pareiguè, chin aloubati, Lingau sourti, Ai! lingau sourti!

Plouro, moun fraire,
Plouras, ma maire!
Caminas en dou.
Enfugissès-vous vers un païs nou.
Lou Paire vou,
Ai! lou Paire vou!

La plano inmènso,
Que recoumenço
Sèns fin e toujour,
Te coungreiara belèu quauque jour
Liberatour!
Ai! Liberatour!

Las! quant de luno, L'uno après l'uno, Au founs di desert, Vous an vist mouri, pàuri fraire fèr, Gardant l'espèr, Ai! gardant l'espèr!

O raço unico!
Raço erouïco!
Toumbant pèr milioun,
Avès apara coume de lioun
Vòsti nacioun,
Ai! vòsti nacioun!

Sabès l'usanço Di grand venjanço. Uno mar de sang Rajo à vòsti pèd e pren vosto man Milo aus uman, Ai! milo aus uman!

> Pamens sus terro, Baile de guerro, A l'iue di curious

<sup>\*</sup> Li dos estrofo precedento soun traducho dou cant Indian.

Vous an rebala, Revenge pïous, Ours-Reguignous, Ai! Ours-Reguignous!\*

Mai, vòsti caro
Pu fièro encaro
E mut' coume un gres,
Vous pestelavias dins voste mesprés,
Gibla pèr res,
Ai! gibla pèr res!

Fugon coumtado
Li pountannado:
Couvo, recata,
Lou fiò divinau que faguè bounda
Tau-Asseta,
Ai! Tau-Asseta!

E lou Messio
Di proufecio,
Sènso armo e tout nus,
Vendra redima terraire e vièis us
Pèr soun trelus,
Ai! pèr soun trelus!

Moun fraire, escouto:
Counchado, routo,
Sièis siècle en entié,
Ma nacioun tant lasso à la fin venié
Que se vendié,
Ai! que se vendié!

<sup>\*</sup> Revenge e Ours-Reguignous coumandèron, en 1890-91, la darriero guerro Indiano, apelado « Guerro dou Messio », e aubourado per Tau-Asseta. Fa presounié, fuguèron fisa per lou Gouver à Buffalo-Bill que li tirasse à travès lou mounde.

Vuei nosto estello Se desmantello: Un grand redemtour, Sènso armo e sèns sang, sauvo moun Miejour Pèr resplendour, Ai! pèr resplendour!

#### MANDADIS

O Nivo-Rouge, \*
Vièi chèfe aurouge,
Menen estrambord!
Couifo-te de plumo e pinto toun cors.
Rouge es moun cor!
Ai! rouge es moun cor!
15 d'outobre de 1905.
F. DE BARONCELLI.

## MISÈ CARDELLO

Ai! pàuri nautre, que fai marrit se faire vièi! Fau pamens veni vièi o mouri jouine, i'a pas de mitan.

Misè Cardello manjavo sus si quatre-vint, pecaire! e lou vieiounge l'avié toucado coume lis autre, semblavo pamens qu'avié pas dequé se plagne, n'i'a forço que porton plus mau si vue crous. Èro encaro drecho coume un i, legissié sis ouro senso bericle, fasié si quatre repas e trissavo la crousto coume à vint an. Dourmié ben e la vesien driha coume un perdigau per li carriero emé si viesti d'ancian tems, propre coume d'aneu. S'èro pas esta si peu blanc e sa figuro frouncido coume un agibet, à peno se i'aurias douna cinquanto an. Eh! ben, lou vieiounge i'avié peréu adus sa deco... Mai uno deco di pus grèvo per uno santo damisello, vergougnouso, devoto e ben

<sup>\*</sup> Nivo-Rouge es atualamen lou chèfe suprème de la nacioun Sioux ; a 95 an.

educado coume èro. Vous atrouvarés que, bèn mau-grat elo, en quete endré que s'atrouvèsse, à taulo emé Moussu lou Curat, en vesito vers li damo dou gros grun coume elo, en fasènt si devoucioun, à la messo, au counfessiounau... à prepaus de tout, à prepaus de rèn leissavo escapa d'aquéli pichot brut que la fasien trata de malapresso pèr aquéli que la vesien pèr lou proumié cop, e que fasien estoufa dou rire lis ami que couneissien sonn infiermita e que poudien pas teni si mino. Elo, pecaire! s'escusavo, èro dins la desoulacioun e à tout moumen venié roujo de la counfusioun. Acò èro lou tourment de sa vido, acò empouisounavo si darrié jour. Li barjaco au lavadou l'apelavon Misè Vessigno e l'escais noum ié restè.

La pauro damisello aurié plus branda dou cantoun de soun fiò, de la crento qu'avié. Restavo de semanado dins soun oustau, pièi, poudent plus ié teni, s'asardavo mai à sourti. Es talamen triste d'estre souleto e vièio!

Avié pres counsulto en touti li medecin de l'encountrado, èro anado en Avignoun vèire moussu Palamar, moussu Agassin e bèn d'autre... Avié meme vist lou curat dis Abiho, mai touti li poutringo e poutité i'avien rèn fa.

Enfetado d'acò acampè un chin que la quitavo pas e assajè de faire passa sus lou comte de la pauro besti li brut mistoulin que de tems en tems l'escapavon: Vilanié ié fasié, pichot pouceu, que t'entende mai! e zou! fasié vejaire de pica lou chin emé soun ventau.

Acò reussiguè pas; li gènt s'estoufavon dou rire e pièi, de fes, lou chin, au moumen vougu, fasié 'n tour à la cousino o s'atrouvavo trop liuen de si coutihoun. Enfin, emai siguèsse qu'uno bèsti, lou brave chin avié coumprés que touti li cop que s'entendié o se sentié quicon, lou bacèu èro pas liuen e esperavo pas la mau-parado...

Madamisello, descounsoulado, assajê de carreja em'elo la vièio Neniho sa chambriero e de faire toumba la fauto sus elo. Aquesto qu'èro un pebre se rebifè coume un cat de revès, tratè sa mestresso de pourcasso e davans tout lou mounde ié diguè que farié miés de se metre un tabouissoun...

Pauro Madamisello Cardello! Se vesié de mai en mai souleto e malurouso, e plouravo...

Plouravo quand venguè se prepausa à-n-elo pèr chambriero la pichoto Boudufouno, un nas en l'èr de vint an. Fauto d'autro, la prenguè. La chato èro un pau patarasso, mai èro fino coume uno argno. Veguè lèu ço que n'èro e ço que falié faire pèr agrada à Madamisello. Lou proumié cop que l'auvàri arribè, — èro lou jour de la fèsto de Moussu lou Curat e s'èron reünido, li damo, pèr i'ana faire coumplimen, — lou brut siguè plus fort qu'à l'ourdinàri, tóuti se revirèron... La pichoto faguè semblant d'avé crento:

- Escusas-me, faguè, acò m'a 'scapa.

Madamisello Cardello fuguè is ange, e, à parti d'aqui, la carrejè pertout ounte anavo. Se lou mendre brut s'entendié, la chambriero s'aubouravo:

- Escusas, fasié, lou brut de Madamisello es iéu que l'ai fa...

E Madamisello, urouso coume un peissoun dins l'aigo, s'espoumpissènt de plesi, cresié de rénaisse.

Un bèu jour, pamens, en sourtent de vespro, Madamisello Cardello s'atrouve mau, ague uno ataco e mourigue tout-d'un-tems.

La pichoto Boudufouno eiretè de l'oustau, di dardeno, di jouièu e di moble, em'acò — emai aguèsse perdu un ferre — se maridè 'mé lou garçoun de Moussu lou Mèro e faguè la damo.

LOU CASCARELET.

# ADIÉU À SANT-GILE

Èr dou Sant-Miquèu, de Ch. Riéu.

Lou vin se vènd plus! Ai, ai, ai, Lis annado se fan marrido! A cha pau tout acò s'en vai! Dins Sant-Gile i'a plus de vido! A bèu aguedre bon vin blanc, Uno vièio glèiso roumano, Acò nous fai pas 'gué de pan, Encaro mens pourta la cano!

#### REFRIN

Lou vese proun espeloufi Lou cabedèu que se debano, De lagno li cor soun clafi Quand se fielo marrido lano!

D'ùni s'en van, lou fan pa 'sprès, Caminon de lègo, de lègo...
— Anen, moun paure Lafourèst, Fau faire coume li coulègo!
— Mai pode pas faire un gros saut, Estènt qu'ai de pichòtis alo, Me bandisse foro moun trau E lande en terro prouvençalo.

Siéu panca di plus malurous; Vesès coume acò se devino: Auriéu pouscu toumba mens dous, Siéu dedins lou bren, la farino! Vers un móunié qu'ai couneigu bóu tèms que serviéu la patrìo, Me siéu trouva lou bèn-vengu; Au-jour-d'uei ié sian en famiho!

Tourna-mai moun fouit vai clanti Sus li routo blanco, póussouso, Urous que sarai de parti Dins li matinado neblouso. E que vòu mai lou carretié, Que sus li bras à 'no nisado, Estre chasque jour matinié Pèr i'ana cerca la becado!

Moun vièi Sant-Gile ounte ai teta, Ounte ma maire es enterrado Crèi ben qu'emai l'ague quita Gardaras toujour mi pensado: Veirai de-longo toun castèu, Ti barri, l'oustau de moun paire; Touto ma vido de barbèu Tèn dins toun camin de Bèu-Caire!

> LAFORÈT, Carretié au Pont-de-Crau

## LOU MEME PAIRE

Jan-Jan de Mouièro es un droulas de vint an qu'a autant de sèn qu'un enfant que teto.

L'autre jour, la vièio Toutouno ié disié :

« Jan-Jan, moun paure bèu, te vaqui negre coume un darboun. Despièi que t'aviéu pas vist coume siés vengu? Ères rous coume un fiéu d'or quand ères pichot, ti frisoun semblavon de canebe!

— Oi! fai Jan-Jan, sabès pas d'ounte acò vèn? Vèn que ma maire s'es maridado dous cop. Soun proumier ome qu'èro un bloundinèu, siguè moun proumié paire; moun peirastre pièi èro negre coume lou rèi moure... Eh! bèn, iéu siéu pas dóu meme paire, tire un pau de chascun, vesès pas?»

LOU CASCARELET.

## MORTUORUM

- Es mort au coumençamen d'outobre 1905 lou doutour Jan Bayol, gouvernaire di Coulounio, senatour di Bouco-dou-Rose que doune dins l'Armana Prouvençau proun poulidi trobo escampihado dins diversis annado dou precious recuei o dins quauquis autri publicacioun.
- Es mort en Avignoun, au mes de janvié d'aquest an, lou venerable pintre P. Grivolas, que mescla à la primadiero boulegado dou felibrige, èro esta l'ami de F. Mistral, de J. Roumanille, de T. Aubanel, d'Anfos Daudet, etc. Grivolas demourara coume l'un di prince de l'Escolo avignounenco. Sis elèvo an pres d'éu un sentimen de la coulour que li fai se recounèisse entre éli. Avien touti pèr lou mèstre em'un grand respèt uno afecioun prefoundo. Li telo de

Grivolas repintant quàsi toujour de sujèt prouvençau soun avalourado à-n-un pres requist pèr lis amaire dou bèu.

— Es mort à Paris, carga d'annado, lou 21 de mars, En Sextius-Michel, felibre majourau, presidènt de la Soucieta felibrenco de Paris, maire dou 15<sup>en</sup> arroundissamen despièi mai de trento an. Noun poudèn miés faire que de douna eici li paraulo que lou senatour Maurise Faure prounounciè, au noum dis ami, sus la toumbo dou telibre tant ama e tant regreta:

Es pas soulamen, cresès-lou, uno famiho desoulado ounte van tóuti nòsti simpatio que plouro En Sextius-Michel, ni meme aquelo autro famiho que n'en fuguè pendènt trento-cinq an la prouvidenço bèn-fasènto, ni meme tout aquest courtege d'ami atrista, es tout un país, touto uno raço, es la Franço ensoulciado di ribo dóu Rose, es touto la Prouvènço que noste ami, miés que tout autre en plen Paris, n'encarnavo l'engêni óuriginau fourma de bello imour de gaieta, de bounta e de generous idealisme.

l'èro vengu, i'a sieissanto an, au tèms di diligènci que l'oustalarié patrialo de Senas n'èro un di relais li plus anima; mai mau-grat lou tèms, en despié de la distànci éu perdeguè jamai un moumen la souvenènço de la vièio ciéuta de-z-Ais que l'avié douna soun pouëti e superbe prenoum e que peréu l'avié lega lou culte di vièii tradicioun prouvençalo.

Se pon dire que la passioun douminanto de Sextius Michel fuguè de garda vivent au founs dou cor, l'amour de la terro nadalo e lou desir

de lou faire parteja à si coumpatrioto.

Co que l'apareiguè lou mejan lou pu segur d'en entre-teni la flamo, fuguè de crea dins la capitalo un fougau literàri miejournau, uno sorto de pichoto Prouvènço pouëtico ounte se gardarié lou parla dou terradou, ounte en evoucant lis ancian souveni, se charrarié e se cantarié dins la douço lengo di troubadour e di felibre.

..... À l'eisèmple de soun coumpatrioto Castil-Blaze, éu èro plus fièr dóu sucès de sis obro prouvençalo que de touti aquéli que courounèron sis obro franceso; mai ço que fuguè surtout l'ounour e la joio de sa vido es sa longo e glouriouso presidènci de la Soucieta di Felibre de Paris, que pendènt un quart de siècle ié permeteguè de faire belugueja i fèsti annalo l'esperit de soun Miejour bèn-ama.

..... Me n'en souvendrai tant qu'aurai un soufle de vido de la darriero escourregudo literàri en Prouvènco. Ero en plen mes d'avoust, avian

festeja ensèn pendènt uno semano sus li routo póussierouso, au mitan dis aclamacioun di foulo, la Reneissènço felibrenco dins de ceremounié ounte, de l'aubo dóu matin à l'estello dóu vèspre, s'inaguravo dous buste pèr jour e se banquetavo e se cantavo en l'ounour de la pouësìo prouvençalo. Anerian, li fèsto acabado, nous pausa à la vesperado souto li sause de la Bartalasso, e aqui, tranquile, urous e fièr de l'obro coumplido, Sextius Michel, lou bon Sextius, asseta sus l'erbo au bord dóu flume, regardavo lou Rose coulant à nòsti pèd e countemplavo lou magnifique panorama d'Avignoun que, coume Aubanel disié:

Fai de dentello, Dins lis estello.

Ravi de la bèuta d'aquéu tablèu, evoucant li souveni dóu passat, toutd'un-cop, s'escridè: « Ah! coume es bèu noste Miejour! coume es douço nosto Prouvènço! »

E s'endourmiguè au brut bressarèu dis oundo roudanenco.

Sextius Michel amavo tant la Prouvènço, que s'es endourmi dóu darrié som, seguramen, en sounjant à-n-elo, au Felibrige que n'es l'incarnacioun vivènto e aguènt au founs dóu cor soun crid d'amour de la Bartalasso.

Dorme en pas, satisfa, o noste ami, dins ta demoro darriero. Tu as noublamen viscu, toun obro sara fegoundo. La Prouvènço gardara ta memòri e noste Miejour cigaliè e felibren te rendra l'amour que ié dounaves. N'en prene eici l'engajamen soulènne, t'aubouraren un buste à l'oumbro de la Glèiso de Sceaux, à coustat di buste fraire de Flourian, de Pau Areno e d'Aubanèu, e, quand tournara lou printèms, li felibre e li cigalié te courounaran, tu peréu, di roso que te plasiés à metre piousamen au front de ti glourious davancié.

E alor nous semblara, o noble despareigu, que siés encaro aqui au mitan

de nautre e l'ilusioun adoucira nosti regrèt.

Dounc, o noste Sextius Michel, au revèire, au revèire dins la ciéuta de Sceaux, emai en Santo Estello!

— Es mort peréu lou grand proufessour E. Boehmer, sòci dóu felibrige que dins soun estudi *Die provenzalische Poesie der Gegenwart*, publicado i'aura bèn lèu quaranto an, avalourè coume se dèu la persounalita de nosto lengo e l'auto pourtado de sa respelido pouëtico.

- A Niço, es peréu mort regreta de touti, M.-S. Audibert, president de la Soucieta felibrenco lis *Enfant de Prouvênço* de Niço.
- En Avignoun, la marqueso de Barouncelli-Javoun, maire de noste valourous coulabouradou En Folcò de Barouncelli, es morto quàsi subitamen, lou  $1^e$  d'avoust, dins soun palais dóu Roure. La marqueso s'èro facho uno plaço requisto dins l'art de la miniaturo ; elo aparè nosto lengo, e fuguè de soun palais dóu Roure que sourtiguè  $\Gamma Aiòli$ . Es aqui que se coungreiè, dins la plenour dis ilustre record, l'amo de l'aposto Folcò... Tóuti nòsti regrèt faran coumpagno à la santo defuntado.
- Lou majourau En Sernin Santy, bouto mai en dou crudèu lou Felibrige. En plen talènt, en pleno voio, éu es mort en Limousin, lou 25 dou mes d'avoust.
- Encaro un dòu. Un di cepoun e di majourau li mai ama dóu Felibrige, En Marius Girard, vèn de mouri à Sant-Roumié, lou 11 d'avoust. En dòu noste Armana Prouvençau, que perd un de si coulabouraire li mai flame, en dòu lou Flourege Prouvençau que plouro soun afeciouna presidènt d'ounour.

Que Dono Girard e sis enfant vogon bèn agrada nòsti plagne amistadous.

Passan la paraulo à F. Mistral que davans lou cros dubert prounounciè lis adessias que veici e que lis assistant escoutèron em'un silènci religious:

Noste eicelênt ami e counfraire Girard èro lou fiéu d'un architèite, coumpatrioto e cambarado de Jóusè Roumanille, e dins soun oustau peirau, soun oustau de Sant-Roumié, noste Marius Girard avié d'enfanço ausi, dins la bouco de Roumanille, cascaia coume eiçò la lengo de Prouvènço:

Dins un mas que s'escound au mitan di poumié, Un béu matin, au tèms dis iero, Steu na d'un jardinié 'mé d'uno jardiniero, Dins li jardin de Sant-Roumié. E poulidamen bressa pèr aquelo pouësìo dóu patriarcho di felibre, Girard s'abarigue dins lou Felibrige pur e prenguè part touto sa vido à la longo e bello lucho de nosto Reneissènço, aquelo Reneissènço qu'a rendu la Prouvènço celèbro e simpatico, se pòu dire, au mounde entié.

Quand Roumanille mourigue, se durbigue no souscripcioun per l'auboura lou mounumen que vuei se vei en Avignoun; lou brave Girard, en fideu disciple, se ié metegue en testo e fague tant e digue tant qu'en ren

de tèms éu acampè la soumo de set milo franc.

Lis obro de Girard, pouësìo entousiasto, mai naïvo e bouniasso, soun rejouncho dins dous libre: Lis Aupiho e La Crau, e, lou mai e lou plus, tout i'es canta, tout i'es escri, au gènt ounour de Sant-Roumié. Vesès bèn aquelo mountagno que fai à Sant-Roumié un incoumparable decor, eh! bèn, dins li vers de Girard, tóuti li mourre o calanc d'aquéli colo pouëtico se ié restèton e miraion: Roumanin, la Vau-Longo, e Vau-Rugo, e Sant-Clergue, lou Lioun de Gaussié, la Caumo, Roco-Rousso, Glèiso-Blanco, la Font-dóu-Merle e la Tourre dóu Cardinau. E dins aquéli vers sèmblo que trepejas de-longo li ferigoulo, li lavando, li roumanin de Sant-Roumié: e acò vous embaumo.

Certo, n'es pas douna 'n touti de basti de mounumen coume vòstis Antico, coume l'Arc-de-Triounfle e lou Mausoulèu di Jùli. Mai pamens, quand de-fes vous espaças de-long d'un gaudre e que ié rescountras uno simplo crous de pèiro, en vièio pèiro de Sant-Roumié, coume poudrian dire la Crous dou Rougadou, n'es pas verai qu'acò fai gau? — E talamen fan gau aquéli mounumen simplas e poupulàri que, vosto Crous dou Rougadou, emai fugue escoundudo au mitan di roumias, souvèntifes l'ai visto courounado de flour pèr quauco man piouso.

La pouësio de Girard es quaucaren, vous dise, coume la Crous dou

Rougadou, un doucumen de fe, de religioun sant-roumierenco!

E o, Sant-Roumieren, dins li siècle à veni, saran curious vòsti felen, emai saran urous, de trouva dins li libre de Marius Girard l'estrambord qu'afougavo au siècle dès-e-nòu li mantenèire e li cepoun de nosto lengo prouvençalo.

Adiéu, moun bon Girard! Subre la toumbo de ti gènt veici dous vers


qu'aviés escri:


O crous santo, crous dis adiéu, Assousto-nous touti en Diéu.

Te vaqui à la sousto que nous espèro touti : pousquen, après, nous vèire touti dins la clarta de santo Estello qu'es lou paradis di felibre!


## ENSIGNADOU

P	ajo.	1	Pajo
Calendié	7	Ame mai! (Antôni Berthier)	5
Crounico felibrenco (Jan Malan)	1 t	Differenci (Lou Cascarelet)	58
La Cansoun dis Avi (F. Mistral)	17	Vihado (Jousè d'Arbaud)	58
La Carita (G. Thérond)	21	A la bono apoustoulico (Lou Cascarelet)	60
La Gibouso (E. Jouveau)	23	La mort de Marius Girard (Ch. Riéu).	6
L'ase (Lou Cascarelet)	24	Lou mau de ventre (Lou Cascarelet)	63
Devinaio (Mikadò)	25	Per li noço de Gras e de Germano	
Counvit Felibren (M. Chabrand)	25	Casso (A. Mouzin)	- 68
Moun Grand Estève (F. Mistral)	26	Michèu Potage (E. Plauchud)	6
Lou reloge dou l'aradou (Ch. Riéu)	30	Lou nouvé dou Tronbaire (R. Ginèste).	63
Uno coumessioun ben facho (L. Vidau).	32	La Bastido (Lou Cascarelet)	69
La Cansoun dou Gardian (M. Girard).	33	Lou nouve di Tambourinaire (Raoul	
Jan Toutouro (Lou Cascarelet)	34	Ginèste)	69
La margarido di prat (Baroun H. Guil-		Tè, Boufèti! (Lou Cascarelet)	72
libert)	36	Lou nouvé di Galerian (R. Ginèste)	73
Boni resoun (Lou Cascarelet)	37	Paraulo retirado (Lou Sauvage)	70
Un bon counsèu (Jan Monné)	38	Mi Bericle (A. Mouzin)	77
Cantadisso di Masié i Gràndi Santo		Un pau de chiffro (Un que saup)	78
(A. Champrous)	39	Lou Doumtaire (Marius Jouveau)	79
Li Fessègue (A. Marrel)	40	Li dous voto (Lou Cascarelet)	80
Sus l'iero (A. Jouveau)	44	Discours de Santo Estello (P. Devoluy)	SI
De bon matin me siéu leva )Jan Malan)	45	Rodo que roudaras (F. Mistral)	85
Li Caieto (Louis Crest)	47	L'iou (Lou Cascarelet)	87
Paciènci (Lou Cascarelet)	47	Lou Soffe (Clouvis Hugues)	83
Devinaio	48	Lou singe de Moussu Boudin (F. Favier)	91
Remembranço (A. Vidal)	49	Lou tiatre d'Aurenjo (R. G.)	97
Paure Medor (L. Vidau)	50	Te tu, te léu (Mikadò)	97
La Martino (Clouvis Hugues)	51	La Carrello (Victor Sylvestre)	98
La Counfituro Lou Cascarelet)	54	Soulomi rouge (F. de Baroncelli)	99
Peusset (Marius Jouveau)	55	(1111)	103
Lou proumié pouteun (A. Vidal)	55	Tidled it bills the property of the property o	105
Sias proun paga 'nsin (Lou Cascarelet).	56	non means parts (mass and mass)	107
Sounet pacan (Antôni Berthier)	57	Mortuorum	107









PC 3398 A7 1907 Armana prouvençau

## PLEASE DO NOT REMOVE CARDS OR SLIPS FROM THIS POCKET

UNIVERSITY OF TORONTO LIBRARY

